

周
易
義
叢

周易義叢卷之九

䷀

乾下
兌上 夬

序卦益而不已必決故受之以夬夬者決也益之極必決而後止理無常益益而不已已乃決也夬所以次益也爲卦兌上乾下以二體言之澤水之聚也乃上於至高之處有潰決之象以爻言之五陽在下長而將極一陰在上消而將盡衆陽上進決去一陰所以爲夬也夬者剛決之義衆陽進而決去一陰君子道長小人消衰將盡之時也

程傳

大揚于王庭乎號有厲告自邑不利即戎利有攸往

夬決也陽決陰也三月之卦也以五陽去一陰決之而已然其決之也必正名其罪而盡誠以呼號其衆相與合力然亦尚有危厲不可安肆又當先治其私而不可專尚威武則利有所往也皆戒之之辭

本義

○夬與剝

反者也剝以柔變剛至於剛幾盡夬以剛決柔如剝之

消剛剛隕則君子道消柔消則小人道隕君子道消則

剛正之德不可得直道而用刑罰之威不可得坦然而

行揚於王庭其道公也

王輔嗣

○夬決也此陰消陽息

之卦也陽長至五五陽共決一陰故名爲夬也揚於王庭者明行決斷之法夬以剛決柔施之於人則是君子

決小人也王庭是百官所在之處以君子決小人故可
以顯然發揚決斷之事於王者之庭示公正而無私隱
也故曰揚于王庭孚號有厲者號號令也行決之法先
須號令夫以剛決柔則是用明信之法而宣其號令如
此即柔邪者危故曰孚號有厲也以剛斷制告令於邑
可也若用剛即戎尚力取勝爲物所疾以此用師必有
不利故曰告自邑不利即戎雖不利即戎然剛德不長
則柔邪不消故陽爻宜有所往夫道乃成故曰有攸往
也

孔穎達

○上六以一小人加於衆君子之上與明夷

之上六同以一昏君而夷文明之臣理勢所當決也夫

之彖辭文王述成湯割正有夏之事以教武王也乎號
即湯誓泰誓是也告自邑先自治也革車三百兩虎賁
三千人此不利即戎之明驗也有所不往往必勝矣故
曰利有攸往荀九家○凡決去柔邪當先明信其法宣

其號令一小人猶在上故須常懷危厲故大傳曰危乃

光也王介甫○告自邑者命始於朝廷行於國邑亦自

邑邑而行之不利即戎者一陰在上小人已窮又攻之

不已是尚力勝君子不爲也利有攸往剛得中也陸秉

○小人方盛之時君子之道未勝安能顯然以君子之

道決去之故含晦俟時漸圖消之道今既小人衰微

君子道盛當顯行之於公朝使人明知善惡故云揚於主
庭孚信之在中誠意也號者命衆之辭君子之道雖長盛
而不敢忘戒備故至誠以命衆使知尚有危道雖以此之
甚盛決彼之甚衰若易而无備則有不虞之悔是尚有危
理必有戒懼之心則无患也聖人設戒之意深矣君子之
治小人必以已之善道勝革之故聖人誅亂必先修己舜
之敷文德是也邑私邑也告自邑先自治也以衆陽之盛
決於一陰力固有餘然不可極其剛至於太過戎兵者強
武之事不利即我謂不宜尚壯武也利有攸往陽雖盛未
極乎上陰雖微猶有未去是小人尚有存者君子之道有

未至也故宜進而往也不尚剛武而其道益進乃夬之善

也伊川○一決之後則由夬而乾往无不利矣故曰利有

攸往張清○庭內而虛九五爲王宮上六爲主庭之象林

栗○乾剛實有孚之象兌號令之象都潔○不利即戎與

其夜有戎言小人當俟隙興兵寇君子不利即戎言君子

不當尚威力以勝小人蓋君子之勝小人固自有道若徒

以力角力則君子未必有加於小人而適以敗天下之事

爾此聖人之所以深戒也丘行可

測曰夬以剛盛長而決一柔將變而爲純乾之時也卦辭

述成湯割正有夏之事所以教武王也揚于王庭聲彼之

罪也在成湯則爲湯誓在武王則爲泰誓三篇是也乎號
集已之力也湯誓曰爾尚輔予一人致天之罰予其大賚
汝牧野之誓近自友邦遠及庸蜀八國之人咸有勗戒是
其義也然君子之防小人者常踈而小人之窺侯抵拒夫
君子者常密是故彼罪雖著吾力雖齊猶未可以爲必能
決之也故曰有厲武成曰惟爾有神尚克相予以濟屯民
无作神羞泰誓曰紂克予非朕文考有罪惟予小子无良
其危之也至矣且无諸已而後非諸人告自邑先自治也
以力服人者非心服也故又不利即戎革車三百兩虎賁
三千人斯武王之用師也夫如是則所以去小人者有其

辭而所以制之之道又出於萬全焉有所不往往必勝矣
故曰利有攸往文王之所爲伐密伐崇以作程作誓亦用
是道焉爾厥後吾夫子告子路以行三軍之法曰必也臨
事而懼好謀而成者也其原蓋出於夬之彖乎

彖曰夬決也剛決柔也健而說決而和

釋卦名義而贊其德

本義

○健而說則決而和矣

王輔

嗣

○夬爲決義五陽決上之一陰也健而說決而和以

二體言卦才也下健而上說是健而能說決而能和決

之至善也允說爲和

伊川

○內健則能決外說則能和

蘭廷瑞

○四罪而天下咸服健而說決而和也

陳阜

揚于王庭柔乘五剛也孚號有厲其危乃光也告自邑不利即戎所尚乃窮也利有攸往剛長乃終也

此釋卦辭柔乘五剛以卦體言謂以一小人加于衆君子之上是其罪也剛長乃終謂一變則爲純乾也

本義

○剛德齊長一柔爲逆衆所同誅而无忌者也故可揚于王庭剛正明信以宣其令即柔邪者危厲之理分明可見故曰其危乃光也

王輔嗣

○柔乘五剛上六乘九五

之剛也衆陽比五贊其親決五爲王位故曰揚于王庭

王介甫

○柔雖消矣然居五剛之上猶爲乘陵之象陰

而乘陽非理之甚君子勢旣足以去之當顯揚其罪于

王朝大廷使衆知善惡也又盡誠信以命其衆使知有
危懼則君子之道乃无虞而光大也當先自治不寬專
尚剛武即戎則所尚乃至窮極矣陽剛雖盛長猶未終
尚有一陰更當決去則君子之道純一而无害之者矣
乃剛長之終也

伊川

象曰澤上於天夬君子以施祿及下居德則忌

澤上於天潰決之勢也施祿及下潰決之意也居德則

忌未詳

本義

○澤上於天夬之象也澤上於天必來下

潤施祿及下之義也夬者明法而決斷之象也忌禁也
法明斷嚴不可以慢故居德以明禁也施而能嚴嚴而

能施健而能說決而能和美之道也

王輔嗣

○若以德

惠自居不能及物君子所忌惡也

石介

○以夫施祿則

果於養賢以夫居德則果於自用衆所忌惡

王介甫

○

夫決之世人君必先以仁義之德自居於身然後可以

明禁忌以示天下則當作明字

胡旦

○君子居德於身

小人自然忌憚

李昉

○澤水之聚也而上於天至高之

處故爲夫象君子觀澤決於上而注漑於下之象則以

施祿及下謂施其祿澤以及於下也觀其決潰之象則

以居德則忌居德謂安處其德則約也忌防也謂約立

防禁有防禁則無潰散也王弼作明忌亦通

伊川

○雨

澤上於天其勢不居必決而下流君子之於德寬以居之然後仁以行之若決而散則不可以畜矣故以此施祿則可以此居德則忌

朱震

測曰法象云何曰施祿及下夫之利也而所富者皆善人矣居德以防讒忌之人夫之義也雖開國承家而小人勿用矣故夫子他日以告樊遲曰舉直錯諸枉此施祿居德之法令也

初九壯于前趾往不勝爲咎象曰不勝而往咎也

前猶進也當決之辭居下任壯不勝宜矣故其象占如

此

本義

○居健之初爲決之始宜審其策以行其事壯

其前趾往而不勝宜其咎也 王輔嗣 ○暴虎馮河孔子

所忌謬於用壯必無勝理熟知不勝果決而往所以致

於咎過故王注云不勝之理在往前也 孔穎達 ○剛以

應剛不能克之 虞仲翔 ○夬決之道不能用之以漸而

躁以決之理必不勝而猶往焉自爲咎也 陸德明 ○國

之大事莫過於戎戰之不勝由果往而前不能料敵故

也 劉牧 ○無應不可先動 朱震 ○九陽爻而乾體剛健

在上之物乃在下而居決時壯于前進者也前趾謂進

行人之決於行也行而宜則其決爲是往而不宜則決

之過也故往而不勝則爲咎也夬之時而往往決也故

以勝負言九居初而壯于進躁於動者也故有不勝之
戒陰雖將盡而已之躁動自宜有不勝之咎不計彼也
伊川○陰居高位而初欲決之猶布衣論權臣不量力
之甚往則不勝其咎宜也

潘夢旂

九二惕號莫夜有戎勿恤象曰有戎勿恤得中道也

九二當決之時剛而居柔又得中道故能憂惕號呼以
自戒備而莫夜有戎亦可無患也

本義

○居健履中以

斯決事能審已度而不疑者也故雖有惕懼號呼莫夜
有戎不憂不惑故勿恤也

王輔嗣

○初不以漸二則惕

懼而號戒之體剛得中而小心翼翼故莫夜有戎不足

憂恤

陸希聲

○九二位之不當故必惕懼守正中之道

行號令至於莫夜可謂勤矣可謂能矣恐有他患者外人之辭被決者之誣勿恤可也讀之當曰惕號莫夜

胡

且

○戎上六也惕號莫夜警也有戎勿恤靜也得中道

矣

東坡

○夬者陽決陰君子決小人之時不可忘戒備

也陽長將極之時而二處中居柔不爲過剛能知戒備處夬之至善也內懷兢惕而外嚴誠號雖莫夜有兵戎亦可勿恤矣

伊川

九三壯于頄有凶君子夬夬獨行遇雨若濡有愠无咎象曰君子夬夬終无咎也

頤頤也。九三當決之時，以剛而過乎中，是欲決小人而剛壯見於面目也。如是則有凶道矣。然在衆陽之中，獨與上六爲應，若能果決其決，不繫私愛，則雖合於上六，如獨行遇雨，至於若濡而爲君子所愠，然終必能決去小人而无所咎也。溫嶠之於王敦，其事類此。

本義

○頤

面頤也。謂上六也。最處體上，故曰頤也。剝之六三以應陽爲善，夫剛長則君子道興，陰盛則小人道長。然則處陰長而助陽，則善處剛長而助柔，則凶矣。夫爲剛長而三獨應上六，助於小人，是以凶也。君子處之，必能棄夫情累，決之不疑，故曰夫夫也。若不與衆陽爲羣而獨行。

殊志應於小人則受其困焉遇雨若濡有愠而無所咎

也王輔嗣

○九三體乾乾爲君子三五同功二爻俱欲

決上故曰君子夬夬也獨行謂一爻獨與上陰相應陽

爲陰所施故遇雨也荀爽

○當君子之世而應小人故

外有沾汙之累內有愠恨之恥然終獲无咎者志有存

焉爾

陸績

○濡變也愠怒也陰陽和而爲雨三始欲獨

行殊志後遇衆和同遂嚮善疾惡怒而決之故終无咎

謂三始欲助小人終能變而從衆故无咎也

劉牧

○爻

辭差錯當云壯于頄有凶獨行遇雨君子夬夬若濡有

愠无咎夬決尚剛健之時三居下體之上又處健體之

極剛果於決者也。頤顙骨也。在上而未極於上者也。三居下體之上。雖在上而未爲最上。上有君而自任其剛決。壯于頄者也。有凶之道也。獨行遇雨。三與上爲正應。方羣陽共決。一陰之時已。若以私應之。故不與衆同而獨行。則與上六陰陽和合。故云。遇雨。易中言雨者。皆謂陰陽和也。君子道長。決去小人之時而已。獨與之和。其非可知。唯君子處斯時。則能夬夬。謂夬其夬。果決其斷也。雖其私與當遠絕之。若見濡汚。有愠惡之色。如此則无過咎也。三健體而處正非。必有是失也。因此義以爲教耳。伊川
○九三處五陽衆君子之林。而獨與上六一小人爲正應。

此小人之謀也。聖人曉之曰：來汝九三，取凶在汝。取无咎亦在汝。汝君子，徒也。舍君子從小人，凶之道也。決然舍小人從君子，无咎之道也。爲九三者，蓋亦謹所擇乎。

楊萬里

○夬之三與五皆曰夬夬者一應陰一比陰非

夬夬不可

余德新

九四臀无膚其行次且牽羊悔亡聞言不信象曰其行次且位不當也聞言不信聰不明也

以陽居陰不中不正居則不安行則不進若不與衆陽競進而安出其後則可以亡其悔然當決之時志在上進必不能也占者聞其言而信則轉凶而吉矣牽羊者

當其前則不進縱之使前而隨其後則可以行矣本義

○不剛而進非已所據必見侵傷失其所安故臀无膚其行次且也羊者抵狼難移之物謂五也五爲夫主非下所侵若牽於五則可得悔亡而已剛亢不能納言自任所處聞言不信以斯而行凶可知矣象言聰不明者同於噬嗑滅耳之凶故象曰聰不明也王輔嗣○志進

決柔而逼於上坐不能安行不能進剛而不當其位也羊觶突不同之物比之用壯者能自牽繫其志不縱其壯則悔亡也是語也聽之而不能明昧其爲道也子夏

傳○羊謂九三若能牽連九三之剛與衆賢協心盡力

上決於小人則其悔亡也

胡旦

○九四以陽居陰剛決

不足欲止則衆陽並進於下勢不得安猶臀傷而居不能安也欲行則居柔失其剛壯不能強進故其行次且牽羊悔亡羊者羣行之物牽者挽拽之義言若能自強而牽挽以從羣行則可以亡其悔然旣處柔必不能也雖使聞是言亦必不能信用也夫過而能改聞言而能用克己以從義唯剛明者能之在他卦九居四其失未至如此之甚在夬而居柔其害大矣

伊川

○四與上同

在君側位望已重无意除亂欲止則衆陽並進於下勢不得安欲往則與六同事心不能斷四若能牽引於羣

陽以進則悔可亡然四不中正非能決者雖聞此言亦必不信李季辨

九五莧陸夬夬中行无咎象曰中行无咎中未光也

莧陸今馬齒莧感陰氣之多者九五當決之時爲決之主而切近上六之陰如莧陸然若決而決之而又不爲過暴合於中行則无咎矣戒占者當如是也本義○莧

陸草之柔脆者也決之至易故曰夬夬也夬之爲義以剛決柔以君子除小人者也而五處尊位最比小人躬自決者也以至尊而敵至賤雖其克勝未足多也處中而行足以免咎而已未足光也王輔嗣○莧陸木根草

莖剛下柔上也九五剛中而比上六故以爲喻子夏傳

○馬融鄭玄王肅皆云莧陸一名商陸爲一草董遇云莧人莧也陸商陸也以莧陸爲二草要皆柔脆之物孔

穎達

○莧者柔脆之物陸者最高之地若小人之在高

位衆皆疾之決之亦易矣

劉牧

○五雖剛陽中正居尊

位然切近於上六上六說體而卦獨一陰陽之所比也

五爲決陰之主而反比之其咎大矣故必決其決如莧

陸然則於其中行之德爲无咎也莧陸曝之難乾感陰

氣之多者也而柔脆易折五若如莧陸雖感於陰而決

斷之易則於中行無過咎矣不然則失其中正也爻辭

言中行无咎象復盡其義云中未光也夫人心正意誠
乃能極中正之道而充實光輝五心有所比以義之不可
而決之雖行於外不失中正之義可以无咎然於中道
未得爲光大也夫子於此示人之意深矣 伊川
上六无號終有凶象曰无號之凶終不可長也

陰柔小人居窮極之時黨類已盡无所號呼終必有凶

也占者有君子之德則其敵當之不然反是 本義 ○處

夫之極小人在上君子道長衆所共棄故非號咷所能

延也 王輔嗣 ○上六居衆陽之上爲不順之人合當誅

罰是則王者號令之所不及矣又曰小人乘尊位不承

號令所以致凶也

徐邈

○无禁辭號呼于天亦終不

能免凶咎

胡旦

○不能號咷以憂而修改其道故凶

介甫

○无號者諸陽不警則有以乘之矣然終亦凶而

況於號令嚴信告自下邑者哉

東坡

○陽長將極陰消

將盡獨一陰處窮極之地是聚君子得時決去危極之

小人也其勢必須消盡故云無用號咷畏懼終必有凶

也

伊川

測曰初九雖當夫時然居下非當任壯之人矧當事

初若任壯則其所謂揚庭孚號告自邑者咸不暇顧

其往之不勝也固宜若後漢之馬謖姜維唐之徐敬

業者是已其不勝也自爲之也故曰爲咎九二莫夜
有戎勿恤何曰夬五君子去一小人初有志而位卑
四位高而无德三與五有其德與位矣而微有所繫
惟二得中正與卦同德曰惕號則其慮出萬全亦與
彖所陳諸義畧同是故莫夜有戎亦可以无患矣此
爻之義唯周公足以當之觀大誥及鴟鵂之詩即所
謂惕號也雖有三監武庚之禍亦未如之何已九三
之壯于頄過剛也非君子之夬也苟獨行遇雨若濡
則君子之夬道也其志密矣人雖有愠又誰咎哉朱
子謂溫嶠之於王敦其事類此亦善証也九四居近

君之位而剛決不足且當衆陽並進之時欲止則勢
不得安欲行則柔不能進象曰臀無膚其行次且者
危之之辭也豈當三監流言周公居東在王左右者
有是人乎曰牽羊悔亡者教之之辭此轉危爲安之
道也又曰聞言不信者策之之辭策其不能信乃所
以激厲之也聖人之不輕絕人如此九五爲夫之主
而與上六爲比有萑陸之象焉然在決之時終在所
決但力於決者又恐失於暴若能決而決之而又不
爲過暴合於中行則无咎矣書曰能哲而惠何憂乎
驩兜有苗巧言令色孔壬此夫道之至善也其次若

太甲之決去昵比成王之決去三監皆覓陸夬夬之義上六之无號其何及矣曰貴慎始也始而能反乎正其終豈至於无號乎

三三

巽下姤
乾上姤

序卦夬決也決必有遇故受之以姤姤遇也決判也物之決判則有遇合本合則何遇姤所以次夬也爲卦乾上巽下以二體言之風行天下天之下者萬物也風之行无不經觸乃遇之象又一陰始生於下陰與陽遇也故爲姤

程傳

○復次剥明治生於亂乎姤次夬明亂生

於治乎時哉時哉未有剥而不復夬而不姤者防乎其

防邦家其長子孫其昌是以聖人貴未然之防是謂易

之大綱 邵康節

姤女壯勿用取女

姤遇也決盡則爲純乾四月之卦至姤然後一陰可見而爲五月之卦以其本非所望而卒然值之如不期而遇者故爲遇遇已非正又一陰而遇五陽則女德不貞而壯之甚也取以自配必害乎陽故其象占如此 本義

○姤遇也施之於人即女遇男也一女而遇五男爲壯至甚故不可取也 王輔嗣 ○小人有不正之行而遇時

猶滌壯之女在姤也取下誤增女字 京氏傳 ○姤之主

在初六其氣尚微安得女壯乎巽爲長女爲風爲入微陰遇陽務入有長女之性且風動而无不入故有一女入五男之象故曰女壯

陸績

○陽在上之物自下上則

反其所故曰復陰者在下之物自下上則與陽遇故曰

姤

王介甫

○姤以一陰卒遇五陽有坤初六履霜之象

文王繫之辭曰勿用取女所以教後世人君之慎於用人也如夏用后羿周用秦仲由不審乎其初終致剝牀之禍孔子曰弑父與君非一朝一夕之故也其所由來者漸矣由辨之不早辨也於乎微矣哉

荀九家

○巽爲

女旣已長矣又姤五月之卦一陰用事剛寢而隕長陰

之來剛不能制是謂女壯也

金君卿

○一陰始生自是

而長漸以盛大是女之將長壯也陰長則陽消女壯則男弱故戒勿用取如是之女取女者欲其柔和順從以成家道姤乃方進之陰漸壯而敵陽者是以不可取也女漸壯則失男女之正家道敗矣姤雖一陰甚微然有漸壯之道所以戒也

伊川

○日月之行一歲十二會聖

王因其會而分之以爲大數觀其所會命其四時京房卦氣提其綱子雲太玄研其細邵子經世衍其妙而後天地日月星辰元會運世皇帝王霸之蘊皆可得而推矣故先天圖中亦函十二辟卦左邊自子至巳陽卦三

十二從震起復分十六卦二陽升於兌宮爲臨由臨以上八卦入乾宮三陽爲泰四陽壯五陽夬六陽乾四月終焉右邊自午至亥陰卦三十二巽宮生於姤分十六卦二陰降於艮宮爲遯由遯以下八卦入坤宮降三陰而爲否四陰觀五陰剝六陰坤十月終焉文王彖復則曰朋來无咎知其後必爲泰也彖姤則曰勿用取女知其後必爲否也周公繫象於復則曰休復吉於姤則曰繫於金柅皆聖人喜泰憂否之意

朱震

測曰姤遇也自復而夬而乾君子道長漸變而爲陽明世界矣而今也乃有一陰生焉蓋自夬來殊出人

期望之外乃人所不願者也故期其至而至則曰復
不期其至而至則曰遇故彖以女壯爲象卦名曰遇
則其合必不以正又卦體以一陰而遇五陽此女德
不貞而壯之甚也夫不貞之女正夫羞以爲妻懷貳
之士賢君羞以爲臣文王之彖姤曰勿用取女所以
教後世之慎於用人也而御治夷狄之法亦可以類
推如夏用有窮后羿周用秦仲襄公及取翟女爲后
由不審乎其初卒致剝牀之禍可不戒哉若以吾人
之心言之亦猶所性之天德初與事物相遇女壯亦
猶吾夫子之所謂非禮也勿用取女者即非禮之勿

視聽言動是也傳復以天地聖人之遇言之此遇以正道而生大業者也乃若隱微之際其正不正最君子之所當致謹者也故曰姤之時義大矣哉

彖曰姤遇也柔遇剛也

釋卦名

本義

○此就爻釋卦名以初六一柔而上遇五

剛所以名遇而用釋卦辭女壯勿用取女之義也

孔穎達

○夬之一陰不爲主者陰往而窮也故曰剛決柔姤之五陽不爲主者陰來而伸也故曰柔遇剛月建一陰月曰姤賓則陰爲主而陽爲之賓矣是姤主陰遇陽而爲

言也

李元量

勿用取女不可與長也

釋卦辭

本義

○一陰既生漸長而盛陰盛則陽衰矣取

女者欲長久而成家也此漸盛之陰將消勝於陽不可與之長久也凡女子小人夷狄勢苟漸盛何可與久也故戒勿用取如是之女

伊川

天地相遇品物咸章也

以卦體言

本義

○勿用取女不可與長者女之爲體婉

婉貞順方可期之偕老滛壯若此不可與之長久故勿用取女天地相遇品物咸章者卦得遇名本由一柔與五剛相遇故遇辭非美孔子更就天地歎美遇之爲義

不可廢也。天地若各亢所處，不相交遇，則萬品庶物无由彰顯。必須二氣相遇，乃得化生。故曰：天地相遇，品物咸章也。

孔穎達

○陰始生於下，與陽相遇，天地相遇也。

陰陽不相交遇，則萬物不生。天地相遇，則化育庶類，品物咸章。萬物章明也。

伊川

○姤巽下乾上，有以坤之初

六變乾初九之義，是爲天地相遇之象。以畫觀之，則一陰之生，是爲五月。五月在辰爲午，南離之光所照耀者也。萬物相見乎離，而蕃衍乎大夏，非品物咸章而何？

李

剛遇中正，天下大行也。

指九五

本義

○天地相遇品物咸章者正乃功成也剛

遇中正天下大行者化乃大行也

王輔嗣

○一女而遇

五男既不可取天地匹配則能成品物由是言之若剛

遇中正之柔男得幽貞之女則天下人倫之化乃得大

行也

註氏

○凡人有剛明之德不遇中正之位則不能

行其道九五有德有位故教化大行

胡翼之

○二五之

剛在姤遇之時皆得中正之位則天下人倫之化大行

非正義所謂剛遇中正之柔男得幽貞之女也

勾微

○

九二亡而後爲遯姤无臣也九五亡而後爲剝姤无君

也剛者二也中正者五也

東坡

○以卦才言也五與二

皆以陽剛居中與正以中正相遇也君得剛中之臣臣遇中正之君君臣以剛陽遇中正其道可以大行於天

下矣

伊川

姤之時義大矣哉

幾微之際聖人所謹

本義

○凡言義者不盡於所見中

有意謂者也

王輔嗣

○就卦以驗名義只是女遇於男

博尋遇之深旨乃至道該天地故謂不盡於所見中有

意謂者也

正義

○贊姤之時與姤之義至大也天地不

相遇則品物不生君臣不相遇則政治不興聖賢不相遇則道德不亨事物不相遇則功用不成姤之時與義

皆甚大也

伊川

象曰天下有風姤后以施命誥四方

風行天下无所不周爲君后者觀其周徧之象以施其命令周誥四方也風行地上與天下有風皆爲周徧庶物之象而行於地上徧觸萬物則爲觀經歷觀省之象也行於天下周徧四方則爲姤施發命令之象也

程傳

○風行草偃天之威令故人君法此以施教令誥於四方也

孔穎達

○風行天下物无不遇姤之象也施乾象

命巽象誥四方取風行天下之象

蔡淵

○風者天之號

令所以鼓舞萬物命者君之號令所以鼓舞萬民風自

天而下无物不遇而君之命令實似之人君尊居九重
與下民本无相遇之理惟王言一布則萬物爭先快覩
莫不鼓舞於其下而君民之心始遇矣

張清子

測曰大象以施命誥四方者何曰天下風行物无有
不遇者矣后以施命誥四方人无有不化者矣此君
子道大行之象也

初六繫于金柅貞吉有攸往見凶羸豕孚蹢躅象曰繫于
金柅柔道牽也

柅所以止車以金爲之其剛可知一陰始生靜正則吉
往進則凶故以二義戒小人使不害於君子則有吉而

无凶然其勢不可止也故以羸豕蹢躅曉君子使深爲之備云象言柔道牽者進也以其進故止之

本義

○金

者堅剛之物梏者制動之主謂九四也初六處遇之始以一柔而承五剛體夫躁質得通而通散而无主自縱者也柔之爲物不可以不牽臣妾之道不可以不貞故必繫于正應乃得貞吉若不牽于一而有攸往行則惟凶是見矣羸豕謂牝豕也羣豕之中羆強而牝弱故謂之羸豕也羣猶務躁也夫陰質而躁恣者羸豕特甚焉言以不貞之陰失其所牽其爲淫醜若羸豕之羣務蹢躅也

王輔嗣

○梏之爲物王肅之徒皆以爲織績之器

婦人所用惟馬融云柅者在車之下所以止輪令不動者也

孔穎達

○絲繫于柅猶女繫于男故以喻初宜繫

于二也順二則貞吉復往見四則凶矣管蔡非金柅也而有周以繫武庚幸周公先其未發而制之假設流言得行於四國則羸豕蹢躅之禍可勝道哉

荀九家

○豕

初羸時力未能動然至誠在於蹢躅得申則申矣姤之初六何以異是預爲之防可也

張橫渠

○姤陰始生而

將長之卦一陰方長而漸盛陰長則陽消小人道長也制之當於其微而未盛之時柅止車之物金爲之堅強之至也止之以金柅而又繫之止之固也固止使不得

進則陽剛真正之道吉也使之進往則漸盛而害於陽
是見凶也羸豕孚蹢躅聖人重爲之戒言陰雖甚微不
可忽也豕陰躁之物故以爲况羸弱之豕雖未能強猛
然其中心在乎蹢躅蹢躅跳躑也陰微而在下可謂羸
矣然其中心常在乎消陽也君子小人異道小人雖微
弱之時未嘗无害君子之心防於微則无能爲矣伊川
九二包有魚无咎不利賓象曰包有魚義不及賓也

魚陰物二與初遇爲包有魚之象然制之在巳故猶可
以无咎若不制而使遇於衆則其爲害廣矣故其象占
如此本義○初陰而窮下故稱魚不正之陰處遇之始不

能逆近者也初自樂來應已之厨非爲犯奪故无咎也

擅人之物以爲已惠義所不爲故不利賓也

王輔嗣

賓謂四乾尊稱賓二據四應不利賓也

虞仲翔

○不正

之陰與剛中之二相比能包而有之使其邪不及於外

得金柅之義

陸希聲

○二以陽處中有包含之德使初

之淫醜不彰於外義存掩惡中饋非正不足成禮其能

致於賓乎

劉牧

○魚民也賓衆也四陽皆遠乎初二近

而有之不及衆也

王逢

○九二居非其位是亦非正人

初來因而攘之同惡共隱雖不離禍咎庸可聞於他人

乎

陳阜

○一民不可有二君古者有分土无分民得道

則歸往失道則携貳而去初无遠近內外之間顧遇民

之道何如耳

朱震

○姤遇也二與初密比相遇者也在

他卦則初正應於四在姤則以遇爲重相遇之道主於
專一二之剛中遇固以誠然初之陰柔羣陽在上而又
有所應者其志所求也陰柔之質鮮克貞固二之於初
難得其誠心矣所遇不得其誠心遇道之乖也包者苴
裹也魚陰物之美者陽之於陰其所悅美故取魚象二
於初若能固蓄之如包苴之有魚則於遇爲无咎矣賓
外來者也不利賓包苴之魚豈能及賓謂不可更及外
人也遇道當專二則雜矣

伊川

九三臀无膚其行次且厲无大咎象曰其行次且行未牽也

九三過剛不中下不遇於初上无應於上居則不安行則不進故其象占如此然既无所遇则无陰邪之傷故雖危厲而无大咎也

本義

○處下體之極而二據於初

不爲已應居不獲安往又无應不能牽據以固所處故

曰臀无膚其行次且也然履得其位非爲妄處特以不

遇其時故致此危厲災非已招故无大咎

王輔嗣

○初

者牽三三則必行斯大咎矣初爲二所制未得牽已故

咎不至大

陸績

○以陽居陽正也守正而不居中是執

節過苦者也二爲不正不可以據四自起凶不可以承
則是持正堅固不苟合之人以不合衆是以危厲然不
爲妄有何大咎

陳阜

○陰陽之情必求相遇二比於初

已包有之三非義求遇何所得哉處則爲二所侵行則
遇情未忘可謂危厲然九三剛正處巽知義不可而舍
之初陰不能牽其後故无大咎

朱震

○二與初既相遇

三說初而密比於二非所安也又爲二所忌惡其居不
安若臀之无膚也處既不安則當去之而居姤之時志
求乎遇一陰在下是所欲也故處雖不安而行則又次
且也次且進難之狀謂不能遽舍也然三剛正而處巽

有不終迷之義若知其不正而懷危懼不敢妄動則可

以无大咎也

伊川

九四包无魚起凶象曰无魚之凶遠民也

初六正應已遇於二而不及於已故其象占如此象云

遠民也言民之去已猶已遠之

本義

○二有其魚故失

之也无民而動失應而作是以凶也

王輔嗣

○陰爲陽

之民初爲二所據故曰遠民也

正義

○孟子曰得道者

多助失道者寡助今九四居不得正動失其中是寡助

之人也

胡旦

○民所繫者德也二以中而繫之民歸之

也四是以起凶

陳皐

○九四居大臣之位與初爲正應

如三監之遇殷民也有姤之幾矣至挾之以爲叛由不
中正故也由是東土列國之民皆爲周公所得其起凶
也固其所自取也於民何咎乎

荀九家

○包者所裹畜

也魚所美也四與初爲正應當相遇者也而初已遇於
二矣失其所遇猶包之无魚亡其所有也四當姤遇之
時居上位而失其下下之離由已之失德也四之失者
不中正也以不中正而失其民必有凶變起者將生之
謂民心旣離難將作矣

伊川

○初者四之正應而與二

遇猶男之失其配君之失其民也今雖未凶凶由是起

矣

吳幼清

九五以杞包瓜含章有隕自天象曰九五含章中正也有隕自天志不舍命也

瓜陰物之在下者甘美而善潰杞高大堅實之木也五以陽剛中正主卦於上而下防始生必潰之陰其象如此然陰陽迭勝時運之常若能含晦章美靜以制之則可以回造化矣有隕自天本无而條有之象也

本義

○

杞之爲物生於肥地者也包瓜爲物繫而不食者也九五履得尊位而不遇其應得地而不食含章而未發不遇其應命未流行然處得其所體剛居中志不舍命不可傾隕故曰有隕自天也

王輔嗣

○居尊當位雖命未

流行而能不改其操无有能墮之者故曰有墮自天言

惟天能墮之耳正義○无中正之德者皆因魚以至於

悔也五德博道尊謀其道不思其欲故食杞匏瓜而已

舍章明之德志在大行不舍教令如天之降也莫不威賴

矣謂剛遇中正而天下大行也子夏傳○杞大木也左

傳云杞梓自楚往當爲杞梓之杞馬融○初有意於五

此瓜蔓延滋之象五以重剛下際於一陰杞根深之象

也此君子用剛正之德正小人淫邪之心當天地相遇

之時使萬物各正性命者也剛健處尊中正無私能施

誥命大興教化所謂剛遇中正天下大行此有其德有

其時有其位者也外施教化內含章美率性修道志不
舍命此能知天命而不憂者也自非天隕其命復何憂
於灾患邪

陸希聲

○九五以爻位无應如杞梓美材反不

與彖剛遇中正之說殊也得位无應如杞梓美材反不
見用包瓜如豈匏瓜也哉之義美材不用內含章美而
不見食也有隕自天者君子仁義之德修諸身遇不遇
用不用歸之天雖見傾隕不以已命不遇舍道德而改
其志也

石介

○杞葉大而蔭可以庇下者也瓜譬則民

瓜雖可欲而潰必自內茹九五當陰長之時含章不耀
中正在上遇九二之賢而用之以剛守中道防民之潰

故曰以杞包瓜用九二以防民之潰者人也盡人謀則有時而勝天然或不勝至於隕越亦天也九五之志知盡人謀而已以謂天之所命以佑下民者在我有隕越者自天隕之吾終不舍天之命也

朱震

○九五下亦无

應非有遇也然得遇之道故終必有遇夫上下之遇由相求也杞高木而葉大處高體大而可以包物者杞也美實之在下者瓜也美而居下者側微之賢之象也九五尊居君位而下求賢才以至高而求至下猶以杞葉而包瓜能自降屈如此又其內蘊中正之德充實章美人君如是則无有不遇所求者也雖屈已求賢若其德

不正賢者不屑也故必含蓄章美內積正誠則有隕自天矣猶云自天而降言必得之也自古人君至誠降屈以中正之道求天下之賢未有不遇者也高宗感於夢寐文王遇於漁釣皆由是道也

伊川

上九姤其角吝无咎象曰姤其角上窮吝也

角剛乎上者也上九以剛居上而无位不得其遇故其

象占與九三類

本義

○進之於極无所復遇遇角而已

故曰姤其角也進而无遇獨恨而已不與物爭其道不

害故无凶咎

王輔嗣

○過中失位是以吝喪健自保而

已故无咎

陸績

○高而傷物者角也當遇之時已獨剛

亢以此求過誰其與之吝可知已

凌唐休

○至剛而在

最上者角也九以剛居上故以角爲象人之相遇由降
屈以相從和順以相接故能合也上九高亢而剛極人
誰與之以此求遇固可吝也已則如此人之遠之非他
人之罪也由已致之故无所歸咎

伊川

測曰姤初一陰爻爲遇之主其上五陽爻則以比應
爲遇之機以剛中爲遇之用二五剛中故制之在我
二能制之於始較之五爲尤善金柅蓋指二而言聖
人欲初之自止也則曰繫于金柅貞吉勉之之辭也
欲其勿進也則曰有攸往見凶危之之辭也皆所以

爲小人謀也又曰羸豕孚蹢躅則探其勢以爲君子
戒此則爲君子謀也二以剛中之德居大臣之位而
與初遇是小人在我管轄之中故爲包有魚之象苟
能先其未發制而用之猶可以无咎若機會一失而
使之遇於衆人則其爲害也寧有旣乎故曰不利賓
且方三監之作釁也苟非周公當其未發而制之使
其害流於四國則否剝之機成矣此姤之時用所以
爲大也三欲遇於初而下乘九二之剛初爲二所先
得居則不安欲趨於上則非正應又巽體務入不忍
遽舍行則不進故爲臀无膚其行次且之象三與初

同體而不得遇亦曰厲矣然既无所得則亦无所傷
故曰无大咎四與初爲正應有主與民之象當姤之
時乃使其遇於二而不及已蓋由已之失德故也四
之失德以不中正而然居上位而失民凶可知矣故
曰包无魚起凶如三監之遇武庚也有姤之幾矣至
挾之以爲叛而東土列國之民皆爲周公所得其起
凶也固其所自取也於民又何咎乎九五以剛中正
之德主卦於上亦猶以高大堅實之木防禦其美善
潰之瓜然者故曰以杞包瓜謂其必能勝而制之也
曰含章者度其時之未可勝而靜晦以俟之也曰有

隕自天者蓋時至則遂能勝之矣夫此之謂回天之術故傳曰志不舍命也昔者少康之於后羿文王之於崇侯虎周公之於管蔡武庚正合此文之義上九姤其角雖剛而无所施其剛也以此求遇人誰與之曰吝且无咎者蓋與九三同其占云亦以見遇之不善用也則反不如不遇之爲愈耳噫姤之一陰其可畏也如此哉

三三

坤下
兌上萃

序卦姤者遇也物相遇而後聚故受之以萃萃者聚也物相會遇則成羣萃所以次姤也爲卦兌上坤下澤上

於地水之聚也故爲萃不言澤在地上而云澤上於地
言上於地則爲方聚之義也

程傳

萃亨王假有廟利見大人亨利貞用大牲吉利有攸往

萃聚也坤順兌說九五剛中而二應之又爲澤上於地
萬物萃聚之象故爲萃亨字衍文王假有廟言王者可
以至乎宗廟之中王者卜祭之吉占也祭義曰公假于
太廟是也廟所以聚祖考之精神又人必能聚已之精
神則可以至于廟而承祖考也物既聚則必見大人而
後可以得亨然又必利於正所聚不正則亦不能亨也
大牲必聚而後有聚則可以有所往皆占吉而有戒之

辭

義

○萃亨聚乃通也假至也王以聚至有廟也聚得

大人乃得通而利正也全夫聚道用大牲乃吉也聚道不

全而用大牲神不福也人聚神佑何往不利

王輔嗣

○

京氏傳曰萃自屯來初往而居四由侯而升爲岳伯也

以卦氣言之屯十二月侯卦萃八月卿卦以周之事宜

之屯當太王王季之世至萃則爲文王之時矣

郎顗

○

招民聚物其道必通故云萃亨天下崩離則民怨神怒

雖復享祀與无廟同王至大聚之時孝德乃洽始可謂

之有廟矣故曰王假有廟聚而无主不散則亂惟有大

德之人能弘正道乃得常通而利正故曰利見大人亨

利貞也大人爲王聚道乃全以此而用大牲神明降福

故曰用大牲吉

孔穎達

○萃象六州之歸屬於文王廟

者人心所繫武王伐商戴主以行所以萃人心也必得九五之位然後可以爲萃之主故曰利見大人亨八百諸侯之會萃於武王乃其象也利貞者所舉必以正也觀諸泰誓可見已用大牲者類于上帝及有事于所過之名山大川也利有攸往伐商必克矣

荀九家

○三十

七卦繇辭有亨字者三十六惟萃有二亨字彖中又无相關之意陸氏曰諸家本无萃下亨字惟王肅本有之利見大人亨聚以正也亨字宜屬上句王輔嗣云通聚

以正以亨字連下句非也

注昭素

○下順而上悅相聚

而亨也

陸秉

○王者萃聚天下之道至於有廟極也羣

生至衆也而可以一其歸仰人心莫知其鄉也而能致其誠敬鬼神之不可度也而能致其來格天下萃合人心總攝衆志之道非一其至大莫過於宗廟故王者萃天下之道至於有廟則萃道之至也天下之聚必得大人以治之人聚則亂物聚則爭事聚則紊非大人治之則萃所以致爭亂也萃不以正則人聚爲苟合財聚爲悖入安得亨乎故利貞萃者豐厚之時也其用宜稱故用大牲吉事莫重於祭故以祭享而言上交鬼神下接

民物百用莫不皆然當萃之時而交物以厚則是享豐
富之吉也夫不能有爲者力之不足也當萃之時故利
有攸往大凡興工立事貴得可爲之時萃而後用是動
而有裕天理然也

伊川

○自四以下宗廟之象鄭康成

謂艮爲門闕蓋四至二互艮體也巽木宮闕象蓋五至

三互巽體也

鄭剛中

○大人五也貞二五位正也當萃

之時利見太人則萃道亨也然必利於貞聚不以正其

能亨乎

徐幾

○王假有廟於萃渙言之者渙散也謂祖

宗精神易散故爲廟以聚之萃聚也謂聚已之精神然
後能至于廟而聚祖考之精神也彖五句各自是一事

聖人見萃有假廟象又見五爲大人象故曰利見大人
亨又見五與二皆得正故曰利貞又見損之時二簋可
用享則萃之時必用大牲乃吉渙之時乃利涉大川則
萃之時必利有攸往也云爾

胡炳文

測曰萃之爲卦順以悅彼此之情聚也剛中而應上
下之情聚也澤上於地發榮滋長之象萬物之聚也
故其卦名爲萃以文王之時事言之六州之諸侯西
南之民心皆萃而歸屬於文王焉是萃之象也王假
有廟得萬國之歡心以事其先王也利見大人言當
其時天下利見文王及天命將革則利見武王也其

亨可知已既利見大人則其所聚无不得其正者若不以其正則非所謂大人矣故彖傳曰利見大人亨聚以正也用大牲吉所以答人心以享百神也利有攸往可以燮伐大商矣凡答人心舉大事皆所以順天命也且萃之爲道惟文王身親見之故其彖辭繁而不殺云王輔嗣曰聚得大人乃得通而利正蓋明有以得乎人民矣全乎聚道用大牲乃吉蓋幽有以格乎鬼神矣聚道不全而用大牲神不福也又曰人聚神祐何往不利故曰利有攸往云

彖曰萃聚也順以說剛中而應故聚也

以卦德卦體釋卦名義

本義

○但順而說則邪佞之道

也剛而違於中應則強亢之德也何由得聚順說而以

剛為主主剛而履中履中以應故得聚也

王輔嗣

○此

就二體及九五之爻釋所以能聚也

正義

○萃之義聚

也順以說以卦才言也上說而下順爲上以說道使民

而順於民心下說上之政令而順從於上既上下順說

又陽剛處中正之位而下有應助如此故能聚也欲天

下之萃才非如是不能也

伊川

王假有廟致孝享也利見大人亨聚以正也用大牲吉利

有攸往順天命也

釋卦辭

本義

○聚道既全乃可以至於有廟設祭祀而

致孝享大人體中正者也通聚以正聚乃得全也天之
爲德剛不違中今順以說而以剛爲主是順天命者也
動順天命可以享於神明无往不利也

王輔嗣

○鄭康

成云四以下爲互艮門闕象五以下互巽爲木此廟象
也王者五廟上聚百物以祭其先於廟及五親奉上也

陸績

○人之來聚聚於貨食也人君聚而能散之謂仁

散而能節之謂政且天道惡盈物又不可以終遇故聚

而能散散而能節斯順天命也

劉牧

○王能萃聚天下

民心歸之當須有以教之教莫先於孝所以假有廟者

凡以致孝享教天下也

盧穆

○王者萃人心之道至於

建立宗廟所以致其孝享之誠也萃之時見大人則能亨蓋聚以正道也萃不以正其能亨乎用大牲承上有廟之文以享祀而言凡事莫不如是豐聚之時交於神者當厚稱其宜也物聚而力贍乃可以有爲故利有攸往皆天理然也故云順天命也

伊川

觀其所聚而天地萬物之情可見矣

極言其理而贊之

本義

○方以類聚物以羣分情同而

後乃聚氣合而後乃羣

王輔嗣

○易大傳曰類聚羣分

有類必有黨有黨必有爭故萃者爭之大也蓋取諸爻

以觀之五能萃二四能萃初三近四而无應則四欲萃
三上近五而无應則五欲萃上豈非交爭之際也哉且
天下未有不聚于一者順以說剛中而應者二與五而
已此所謂大人也大人者因其所萃而聚之從我者納
之不從者撫之萃有二亨萃未有不亨者其未見大人
則亨而不正爭非其有之謂故曰利見大人亨聚以正
也王至於有廟而致孝享非安且暇不能也物見其安
且暇安得不聚而歸之此聚之正也易言薦與禴享非
正言也皆有義焉大傳曰何以聚人曰財萃言用大牲
猶曰用大利祿云天之命我爲物主非以厚我也主而

亨之則道大行矣故利有攸往順天命也觀其所聚不期而會必正情也東坡○觀萃之理可以見天地萬物之情也天地之化育萬物之生成凡有者皆聚也有无動靜終始之理聚散而已故觀其所聚則天地萬物之情可見矣伊川

象曰澤上於地萃君子以除戎器戒不虞

除者修而聚之之謂本義○聚而无防則衆心生王輔

嗣○放牛歸馬除去戎器因民之隙訓習師旅以爲國

備胡旦○正義曰澤上於地則水潦聚故曰萃愚意此

澤字與說萬物者莫說乎澤之意同澤既上於地則潤

澤廣被物得廣聚若水潦則傷物義必不然

王昭素

○

澤上於地爲萃聚之象君子觀羣象以除治戎器用戒備於不虞凡物之萃則有不虞度之事故衆聚則有爭物聚則有奪大率旣聚則多故矣故觀萃象而戒也除謂簡治也去弊惡也除而聚之所以戒不虞也

伊川

○

兌澤之水上於坤地之上有散而方聚之象水聚而不防則潰衆聚而不防則亂除者去舊取新之謂戎器久則必弊當簡治而除其弊壞也

張清子

測曰太象以除戎器戒不虞者何曰其順以悅乎順以禦逆謂之應兵悅以使民謂之義戰苟未順民心

而欲強以使之則除戎器爲黷武也

初六有孚不終乃亂乃萃若號一握爲笑勿恤往无咎象曰乃亂乃萃其志亂也

初六上應九四而隔於二陰當萃之時不能自守是有孚而不終志亂而妄聚也若呼號正應則衆以爲笑但勿恤而往從正應則无咎矣戒占者當如是也

本義

○

有應在四而三承之心懷嫌疑故有孚不終也不能守道以結至好情志迷亂萃不以禮故曰乃亂乃萃一握者小之貌也爲笑者懦劣之貌也已爲正配三以近寵若自號爲一握之小執其懦劣之容則不憂於三往必

得合而无咎矣

王輔嗣

○坤順之始有信者也未及於

中故不終也一握非有所長之意爲笑順從三之意若

號而自謂已非有長又順而從之即所志必伸

陸明德

○號呼自省度其可否一衆反而哂之

子夏傳

○初求

適中誠信未定若人以已處萃之始未至盈大以小見

笑則勿用憂恤終得盈大動而有應故无咎

劉牧

○初

與四爲正應本有孚以相從者也然當萃時三陰聚處

柔无守正之節若舍正應而從其類乃有孚而不終也

乃亂惑亂其心也乃萃與其同類聚也初若守正不從

號呼以求正應則一握笑之矣一握俗語一團也謂衆

以爲笑也若能勿恤而往從剛陽之正應則无過咎不
然則入小人之羣矣

伊川

○初六柔不中正進則疑六

三之間已退不能專一以待應乃亂者退而亂於三陰
之中乃萃者欲進而與四相萃也若四在上號召之三
陰惡初之往合於四一握其手笑以喻意微動之也萃
聚之世上下相求以陰從陽動而得正何恤小人之笑
而不往哉自古不知堅守其節從應以動舍君子之正
義畏小人之非笑相率陷於非義皆不知萃之道故也

朱震

六二引吉无咎孚乃利用禴象曰引吉无咎中未變也

二應五而雜於二陰之間必牽引以萃乃吉而无咎又
二中正柔順虛中以上應九五剛健中正誠實而下交
故卜祭者有其孚誠則雖薄物亦可以祭矣

本義

○居

萃之時體柔當位處坤之中已獨處正與衆相殊異操
而聚民之多僻獨正者危夫能變體以遠於害故必見
引乃吉而无咎也禴殷春祭名也四時祭之省者也居
聚之時處於中正而行以忠信故可以省薄薦於鬼神
也

王輔嗣

○萃之爲義貴相從就聚道乃成今六二以

陰居陰復在坤體志於退靜則是守中未變不欲相就

者也非衆違時故與牽引乃得吉而无咎也

孔穎達

○

柔不先唱盡誠應五五必見援引故吉而无咎二下之

中也中正盡誠祭必受福何尚多品陸績○萃之爲道

不期而聚相聚之道貴於和同二獨應於五不同其他

咎何免焉若能引已接衆與之同萃於上則吉且无咎

矣雖誠信可以薦神明而不能協衆以其守中未知變

也陳臯○初陰柔又非中正恐不能終其孚故因其才

以爲之戒二雖陰柔而得中正故雖戒而微辭引吉无

咎引者相牽也人之交相求則合相待則離二與五爲

正應當萃者也而相遠又在羣陰之間必相牽引則得

其萃矣五居尊位有中正之德二亦以中正之道往與

之萃乃君臣和合也其所共致豈可量乎是以吉而无咎也乎乃利用禴乎信之在中誠之謂也禴祭之簡薄者也菲薄而祭不尚備物直以誠意交於神明也乎乃者謂有其乎則可不用文飾專以至誠交於上也以禴言者謂薦其誠而已蓋其中實者不假飾於外用禴之義也乎信者萃之本也不獨君臣之聚凡天下之聚在誠而已

伊川

○下卦中爻多引其類如泰與小畜之二

是也本爻與五爲正應引初六六三以萃於五爲得君

臣之大義故吉而无咎

馮奇之

六三萃如嗟如无攸利往无咎小吝象曰往无咎上巽也

六三陰柔不中不正上无應與欲求萃於近而不得故
嗟如而无所利唯往從於上可以无咎然不得其萃困然
後往復得陰極无位之爻亦可小羞矣戒占者當近舍
不正之强援而遠結正應之窮交則无咎也

本義

○履

非其位以比於四四亦失位不正相聚相聚不正患所
生也干人之應害所起也故萃如嗟如无攸利也上六
亦无應而獨立處極而憂危思援而求朋巽以待物者
也與其萃於不正不若之於同志故可以往而无咎也
二陰相合猶不若一陰一陽之至故有小吝也

王輔嗣

○六三履非其位欲萃於四四應初欲萃於二二應五

莫知所萃故萃如嗟如上六无與據高慮危孤立求助
六三動而往則正正則无咎然萃於二四之間故小吝

朱震

○三陰柔不中正之人也求萃於人而人莫與故
嗟如唯往而從上六则无咎三與上雖非陰陽正應然
萃之時以類相從皆以柔居一體之上又皆无與居相
應之地。上復處說順之極故得其萃而无咎也。易道變
動无常在人識之然而小吝何也。三始求萃於四與二
不獲而後往從上六人之動爲如此雖得所求亦可小
羞吝也。伊川○號與嗟皆上兌口之象。號可无咎嗟何
所利。必不得已唯往從上六則亦可以无咎耳。又曰小

吝者以別初之往无咎也。初往從四四其應也。故无咎。三往從上上非應也。故雖无咎而小吝。朱子以上爲正應之窮交。正應二字恐誤。胡炳文

九四大吉无咎。象曰大吉无咎。位不當也。

上比九五下比衆陰得其萃矣。然以陽居陰不正。故戒占者必大吉然後得无咎也。本義○履非其位而下據

三陰。得其所據。失其所處處萃之時不正。而據故必大吉立夫大功然後无咎也。王輔嗣○以陽居陰故位不

當。承五應初。故大吉无咎。虞仲翔

○九四无他辭而直

謂大吉然後无咎者何。顯戒之也。夫萃之世弱趨於剛

闇依於明勢也。四臣位也。陽剛處其始以說以澤而接
三陰民樂歸之者也。若能不專君惠乃心罔不在王室
非吉之大者乎。鳴嘻五雖得貴位然惠未孚而民不趨
萃道固鬱矣。若舍元永貞之德於勢可勝悔哉。惟造微
者極於敬畏乃得无咎耳。孫坦○管仲有奢僭不正之
失而能九合諸侯立大功以掩其過正合此象。阮渾○

大吉謂匪躬盡瘁始終无玷可免專民之咎。若以立大
功免咎實難何以伏誅。房喬○四當萃之時上比九五

之君得君臣之聚也。下比下體羣陰得下民之聚也得
上下之聚可謂善矣。然四以陽居陰非正也。雖得上下

之聚必得大吉然後爲无咎也大爲周徧之義无所不
周然後爲大无所不正則爲大吉大吉則无咎也夫上
下之聚固有不由正道而得者如齊之陳恒魯之季氏
是也然得爲大吉乎得爲无咎乎故九四必能大吉然
後爲无咎也伊川○四得上下之聚而非君位故言不
當也郭雍

九五萃有位无咎匪孚元永貞悔亡象曰萃有位志未光
也

九五剛陽中正當萃之時而居尊固无咎矣若有未信則
亦修其元永貞之德而悔亡矣戒占者當如是也象云

未光謂匪孚

本義

○處聚之時最得盛位故曰萃有位

也四專而據已德不行自守而已故曰无咎匪孚夫修

仁守正久必悔消故曰元永貞悔亡

王輔嗣

○當萃處

尊不能博施獨應於二故曰未光四據其民志不爲邪

將立大功以補報於五五未失業故无咎匪孚也能體

元善居上應下守其中道永保貞吉故悔亡也

陸希聲

○萃惟上體二陽萃聚衆陰九四大吉无咎文王之象

九五萃有位无咎武王之象詩曰上帝臨汝无貳爾心

所謂元永貞也

荀九家

○四幹其位民咸附之是我德

化不弘信未及物永修仁德悔乃消亡

勾微

○九五居

天下之尊萃天下之衆而君臨之當正其位修其德以陽剛居尊位稱其位矣爲有其位也得中正之道无過咎也如是而有不信而未歸者則當自反以修其元永貞之德則无思不服而悔亡矣如苗民逆命帝乃誕敷文德是已舜德非不至也蓋有遠近昏明之異故其歸有先後既有未歸則當修德也伊川○比以一陽統五陰一陽爲之主也一則專專則衆陰順從惟五之歸故五有顯比之吉萃以二陽統四陰二陽爲之主也二則分分則衆陰有萃四者有萃五者而五不得以專其萃故在五有匪孚永貞之戒丘行可

上六齋咨涕洟无咎象曰齋咨涕洟未安上也

處萃之終陰柔无位求萃不得故戒占者必如此而後
可以无咎也

本義

○處聚之時居於上極五非所乘內

无應援處上獨立近遠无助危莫甚焉齋咨嗟嘆之辭
也若能知危之至懼禍之深憂病之甚至於涕洟不敢
自安亦衆所不害故得无咎

王輔嗣

○上六與商之多

士同象周公以王命告之曰爾乃尚有爾土爾乃尚寧
幹止爾不克終爾不啻不有爾土予亦致天之罰于爾
躬即齋咨涕洟无咎之義也

荀九家

○上六以柔乘剛

處上獨立危而无助必至於求萃而之三齋持也咨嘆

息上三相持動而憂懼涕洟則无咎三亦陰柔不足爲
助朱震○六說之主陰柔小人說高位而處之天下孰
肯與也求萃而人莫之與其窮至於齎咨而涕洟也齎
咨咨嗟也人之絕之由已自取又將誰咎爲人惡絕不
知所爲則隕穫而至於嗟涕真小人之情狀也

伊川

測曰萃之初與四爲正應固其所當萃者也始固有
孚但隔於二陰且與之比初復質柔不能自守以需
正應乃急於求萃而苟且與比者萃也志則亂矣故
曰有孚不終乃亂乃萃若號一握爲笑斯庸衆人之
情也然爲初計但能勿恤而往從已之正應焉則其

志有終而无妄聚之失矣此所謂善補過者也故曰
无咎二應五而樅於二陰之間其可舍二陰而獨往
乎故必牽連二陰以上萃於五則吾旣得所萃之正
而又无離羣爲邪之嫌吉而无咎也且二虛中而五
誠實以是相交孚可知已若然則可以不尚文飾而
獲福於上矣故曰孚乃利用禴如伊尹之於成湯太
公望之於文王蓋其人也六三之與上六雖在相應
之交而非陰陽之正應又皆陰柔三不中正而上乃
无位如是而萃誠可嗟而无所利矣夫所謂往无咎
者其舍上六而求萃於九五乎五爲萃主又三至五

爲互巽必能順而受之故曰往无咎然始恃所合之
小人其晚也不利而後得所從焉故雖无咎亦小吝
九四上比九五而與君萃下比衆陰而與民萃得其
萃矣然以陽居陰不正故必使其萃於上下者一出
於正而大吉乃得无咎傳曰大吉无咎位不當也以
周之時事言之其四友之臣乎其所以疏附後先奔
走禦侮者皆大吉之道也故得无咎曰位不當者以
其未命於天子故也九五萃有位无咎者以其有剛
中正之德故也既有其德復有其位則人无不信行
无不利矣故曰无咎若或居此位而人有未信者則

是吾之德有未至也亦但反己自修其元永貞之德耳元永貞即剛中正而无失是已如此則又何不信之有故悔亡若文王之受天命而殷之君臣罔或攸忌武王伐商正其位而不失天下之顯名斯萃有位无咎之徵也其有匪孚則崇侯虎及多士多方之類文王修文德因崇壘而降之周公置師保之誠而民罔不懷斯亦悔亡之驗也上六以陰柔之質爲說之主由媚說而盜高位是以禍至而齊咨涕洟无所咎也如其德安乎上臨難不懼又何齊咨涕洟之有戒占者如何曰嗟何及矣

䷬

巽下升
坤上

序卦萃者聚也聚而上者謂之升故受之以升物之積聚而益高大聚而上也故爲升所以次於萃也爲卦坤上巽下木在地下爲地中生木木生地中長而益高爲升之象也

程傳

升元亨用見大人勿恤南征吉

升進而上也卦自解來柔上居四內巽外順九二剛中而五應之是以其占如此南征前進也

本義

○巽順可

以升陽爻不當尊位无嚴剛之正則未免於憂故用見大人乃勿恤也南征吉者以柔之南則麗乎大明也

注

輔嗣

○京氏傳曰升自蹇來二社居五柔以時升也又

辭曰貞吉升階踐柞之象以卦氣言之蹇十一月卿卦

升十二月公卦由復至臨陽氣既出臨地面則柔順之

德當升居乾之九五有大君之象矣郎顗○木生地中

日長於上故謂之升鄭康成○木柔地順養而長之此

元亨之德其德日升用此而往可見大人柔以時升志

在濟物物必偕升故有喜焉升而向明吉其宜矣陸績

○京傳升自蹇來王弼註升以柔之南麗乎大明用蹇

互體離其說卦變與京傳同鄭大○尊爻无此人故不

云利見代淵○王輔嗣云以柔之南則麗乎大明即齊

乎巽相見乎離之義也

劉牧

○升者進而上也升進則

有亨義而以卦才之善故元亨也用此道以見大人不
假憂恤前進則吉也南征前進也

伊川

○升進也升而

上之則有大通之理是以元亨大人二也用見五應之
也南征吉者二能前進以應乎五則吉矣

張清子

測曰升之卦變自蹇而來柔本居二今進而上居於
五故彖傳以剛中而應言爻象以乎言柔上居五是
柔以時升也亦猶臣升而居君之位故聖人名其卦
曰升如舜以玄德升聞陟帝位文王以克明德受天
命此升之義且其卦德內巽外順夫內巽則稱而隱

外順則直而和是其德之利於進也如舜之玄德協于帝文王之顯民用西土怙冒聞於上帝皆升之德也卦體二剛中而五應之是在我既有剛中之具而在上復應之以虛中之君是其時命又利於進也蓋舜之應在堯若文王則自天祐之而殷紂復爲之敗民以歸之則亦有上應之義又升之時也故其占爲元亨曰用見大人者在舜則用見帝堯若文王則用見太公望而天下之人又用見舜與文王也勿恤者見則不憂其不升矣傳所謂有慶是也南征者前進也即舜之受終于文祖文王之膺天命以撫方夏詩

所謂四方攸同王后維翰是也或曰南征吉此文王教嗣君以敕殷之事亦升之義也

彖曰柔以時升

以卦變釋卦名

本義

○升之爲義自下升高故就六五

居尊以釋名升之意六五以陰柔之質起升貴位若不得時則不能升矣故曰柔以時升也

孔穎達

○六五自

二升居於五以人臣而得君位其時使之然也

集注

○

陰陽二氣迭爲升降陰升則陽降陰降則陽升未有陽常升而不降陰常降而不升者反萃而升是二陽降居下三陰反居上故曰柔以時升

李舜臣

巽而順剛中而應是以大亨

以卦德卦體釋卦辭

木義

○純柔則不能自升剛亢則物

不從既以時升又巽而順剛中而應以此而升故得大

亨

王輔嗣

○以二體言柔升謂坤上行也巽既體卑而

就下坤乃順時而上升以時也謂時當升也柔既上而

成升則下巽而上順以巽順之道升可謂時矣二以剛

中之道應於五五以中順之德應於二能巽而順其升

以時是以元亨也彖文誤作大亨解在大有卦

伊州

○

易以陽爲大巽順不足以大亨必剛中而應是以大亨

胡旦

用見大人勿恤有慶也南征吉志行也

凡升之道必曰大人升於位則曰王公升於道則曰聖
賢用巽順剛中之道以見大人必遂其升勿恤不憂其
不遂也遂其升則已之福慶而福慶及物也南人之所
向南征謂前進也前進則遂其升而得行其志是以吉
也程傳○以大通之德用見大人不憂否塞必致慶善
故曰有慶也往於闔昧非其本志今以柔順而升大明
其志得行也孔穎達○巽以剛中而往坤以柔中而來
以實升虛上下相應是以大亨也五以柔居尊位是虛
已而中正者也二以剛中而往不爲邪諂者也往則見

納如石投水若行此道以求見大人則何用憂恤必有慶也茲乃元凱之升於舜也陽氣左行而南巽順陽氣而發生故南征吉志行者文王柔以時升漸基王迹武王終獲南狩之志湯亦伐桀升自陞陞南也柔升明君子之志行此謂六四之德也

劉牧

象曰地中生木升君子以順德積小以高大

王肅本順作慎今按他書引此亦多作慎意尤明白蓋古字通用也說見上篇蒙卦

本義

○地中生木始於細

微以至高大始於毫末終至合抱故爲升象君子象之以順行其德積其小善以成大名故繫辭云善不積不

足以成名是也

孔穎達

○積德而升何往不從故六爻

之義鮮有悔咎

陳臯

○木生地中長而上升爲升之象

君子觀升之象以順修其德積累微小以至高大也順則可進逆乃退也萬物之進皆以順道也善不積不足以成名學業之充實道德之崇高皆由積累而至積小所以成高大升之義也

伊川

測曰大象何以順德積小以高大高陵呂氏曰其巽以順乎夫順言乎其坤也積言乎其巽也故君子舍信美而求聖神外致曲而思變化吾未見其然也

初六允升大吉象曰允升大吉上合志也

物以柔順居下巽之主也當升之時巽於二陽占者如之則信能升而大吉矣

本義

○允當也巽卦三爻皆升

者也雖无其應處升之初與九二九三合志俱升當升之時升必大得是以大吉也

王輔嗣

○初雖失正乃與

二陽允然合志俱升上位六處升之初爲巽之主无應於上進不在私四亦无應與已合志爲衆所信故升而大吉

陸希聲

○初以柔居巽體之下又巽之主上承於

九二之剛巽之至者也二以剛中之德上應於君當升之任者也允者信從也初之柔巽惟信從於二信二而從之同升乃大吉也二以德言則剛中以為言則當

任初之陰柔又无應援不能自升從於剛中之賢以進
是由剛中之道也吉孰大焉

伊川

九二孚乃利用禴无咎象曰九二之孚有喜也

義見萃卦

本義

○與五爲應往必見任體夫剛德進不

求寵閑邪存誠志在大業故乃利用薦約于神明矣

王

輔嗣

○象言有喜者上升則爲君所任薦約則爲神所

享斯之爲喜不亦宜乎

孔穎達

○剛而能正中而无私

應上以孚盡下之義豈俟豐物而後享焉上應其誠下

升而大雖非其位得其道也故有喜无咎

子夏傳

○以

陽處陰以剛應柔以此而升萃以應也升與萃爲反對

萃之六二以盡誠於五升之九二以推誠於五故皆利

用禴

陸績

○二正卦變往來之交故曰孚乃利用禴有

喜也虞舜之於帝堯正此爻象

鄭夫

○二陽剛而在下

五陰柔而居上夫以剛而事柔以陽而從陰雖有時而然非順道也以暗而臨明以剛而事弱若黽勉於事勢非誠服也上下之交不以誠其可以久乎其可以有爲乎五雖陰柔然居尊位二雖剛陽事上者也當内存至誠不假文飾於外故曰利用禴謂尚誠敬也自古剛強之臣事柔弱之君未有不爲矯飾者也禴祭之簡質者也云孚乃謂既孚乃宜不用文飾專以其誠感通於上

也如是則得无咎象云有喜者言二能以孚誠事上則不惟爲臣之道无咎而已可以行剛中之道澤及天下是有喜也

伊川

九三升虛邑象曰升虛邑无所疑也

陽實陰虛而坤有國邑之象九三以陽剛當升時而進臨於坤故其象占如此

本義

○履得其位以陽升陰以

斯而舉莫之違距故若升虛邑也

王輔嗣

○九三升於

上六六體陰柔不拒於已往必得邑何所疑乎

孔穎達

○坤稱邑也五虛无君利三上居之與明夷南狩同義

荀爽

○剛得位而有應前无難之者其升无疑升虛邑

者易而少之也湯武之升是已

王介甫

○三以陽剛之

才正而且巽上皆順之復有援應以是而升如入无人

之邑孰禦哉

伊川

○上皆陰柔往无所疑

張橫渠

六四王用享于岐山吉无咎象曰王用享于岐山順事也

義見隨卦

本義

○處升之際下升而進可納而不可距

也距下之進攘而自專則殃咎至焉若能不距而納順

物之情以通庶志則得吉而无咎矣岐山之會順事之

情无不納也

王輔嗣

○六四在升之時下體三爻皆來

上升事同文王岐山之會故曰王用享于岐山順事者

順物之情而立功立事故曰順事也

孔穎達

○升之六

四柔以時升太王之德也隨之上六天下悅隨文王之德也太王在岐直曰岐山武王在鎬故曰西山

陸希聲

○下有三爻皆務上升已當納之上近至尊體是坤順又順事於上文王岐山之會得上下之心也三分天下有其二以服事殷是順而事上也

石介

○四柔順之才

上順君之升下順下之進已則止其所焉以陰居柔陰而在下止其所也昔者文王之居岐山之下上順天子而欲致之有道下順天下之賢而使之升進已則柔順謙恭不出其位至德如此周之王業用是而亨也四能如是則亨而吉且无咎矣

似川

○岐山在禹貢雍州境

南坤西南象王蓋指文王而言六四坤體本順又以柔居柔順之至也以順道而升此岐之王業所以亨也故有吉而无咎會幾

六五貞吉升階象曰貞吉升階大得志也

以陰居陽當升而居尊位必得正固則可以得吉而升

階矣階升之易者

本義

○升得尊位體柔而應納而不

距任而不專故得貞吉升階而居尊也

王輔嗣

○六五

以柔居尊位納於九二不自專權故得保其尊位而踐

阼矣故曰貞吉升階

孔穎達

○六五以柔居尊位即象

所謂柔以時升者也蓋虞舜及武王之象

鄭夬

○以柔

居尊有應於二是能委任於臣又以居中是正而得吉也升階者如自階升堂得居至尊之位也

石介

○六五

虛中降位而接九二九二階之以升則五正而吉不正則信賢不篤用賢不終其能吉乎五正而吉者以二升階也五正而升君臣道行由是而致治故五大得志也

朱震

○五以下有剛中之應故能居尊位而吉然質本

陰柔必守貞固乃得其吉也若不能貞固則信賢不篤任賢不終安能吉也階所由而升也任剛中之賢輔之而升猶登進自階言有由而易也指言九二正應然在下之賢皆用升之階也能用賢則彙升矣

伊川

○坤爲

土故曰階六五柔進而上行貞正則吉階而升之則由岐山而豐鎬可以尊處九陞之上矣

張清子

上六冥升利于不息之貞象曰冥升在上消不富也

以陰居升極昏冥不已者也占者遇此无適而利但可反其不已於外之心施之於不息之正而已

本義

○處

升之極進而不息者也進而不息故雖冥猶升也故施於不息之正則可用於爲物之主則喪矣終于不息消之道也

王輔嗣

○已在升極是昧於升進之理若能知

時消息不務進往而守其正即利也息如生息之息但自消退不更求進乃利也消不富蓋非陽爻无陽明之

德所以消不富也

石介

○冥謂杳冥也言升之極而至

於杳冥矣是升而无所往畢湊於已也且衆湊已則所耗至多故象曰消不富也然君子居於上位衆來升已不以耗損多而不納之納之又幾困匱故利於自強不息貞幹以濟於衆然非有大人之德者其孰能行之哉

劉牧

○處於升極在衆陰之上自下升者无不巽順已

勢高權盛合推功讓能衆進不得中升而不已至於不可升之處猶自升之是冥升者乎若不能止必致其困既困物必消散无以保其所有之富盛矣孔子云君子以自強不息利不息之貞者要义行正道耳疏謂爲政

不息終至消耗非也

王昭素

○六以陰居升之極昏冥

於升知進而不知止者也其爲不明甚矣然求升不已之心有時而用於真正而當不息之事則爲宜矣君子於真正之德終日乾乾自強不息如上六不已之心用之於此則利也以小人貪求无已之心移於進德則何善如之

伊川

○上六處坤之上升之極猶之晦冥陰暗

而猶升焉此進而不息者也若能以升位之心而移之

於升德則愈增高也易曰終日乾乾自強不息詩曰

文王之德之純純亦不已此非利於不息之貞也歟

張

清子

測曰升之六爻皆有升義初六據其才而言似不能
升然以其當升之時能巽以從陽故二陽挾之以升
拔茅連茹其升必矣故曰允升大吉如殷亳都及造
邦之賢德忠良皆以伊尹仲虺而升周西土友邦之
人士皆以四友之臣而升故傳曰上合志也二剛健
中正誠實而上交五柔順中正虛中以下應又卦變
往來之爻也其相孚若是則宜不事文飾專以誠意
感通於上自足以行其剛中之志而澤及於天下矣
天下之受福即已之受福也故曰孚乃利用禴又何
咎之有焉若大舜之於帝堯正此爻之義也九三剛

則不困正則不疚巽則不躋以是而升而外皆順之
如入无人之邑夫何疑哉故爲升虛邑之象而占亦
如之若周召分主二伯之地蓋其象也六四以柔居
柔蓋柔順之至誠意之極也是積其誠意以升者也
故王用享于岐山吉且无咎蓋指文王及武王之爲
方伯時事然周之王業實興隆於此故舉方伯之享
岐山而天下望秩之祭肇在茲矣六五以柔升居尊
位即彖傳所謂柔以時升者也然亦必以貞固然後
得吉而升階曰升階者蓋以其時之當得升也而復
持之以貞何難之有故贊其易蓋周公以况大舜及

武王之事云上六之冥升非利也而占有時乎利者
惟不息之貞而已書曰惟狂克念作聖此聖人之占
法也

三三

坎下
兌上 困

序卦升而不已必困故受之以困升者自下而上自下
升上以力進也不已必困矣故升之後受之以困也困
者憊乏之義爲卦兌上而坎下水居澤上則澤中有水
也乃在澤下枯涸无水之象爲困乏之義又兌以陰在
上坎以陽居下與上六在二陽之上而九二陷於二陰
之中皆陰柔掩於陽剛所以爲困也君子爲小人所掩

蔽窮困之時也

程傳

困亨貞大人吉无咎有言不信

困者窮而不能自振之義坎剛爲兌柔所掩九二爲二陰所掩四五爲上六所掩所以爲困坎險兌說處險而說是身雖困而道則亨也二五剛中又有大人之象占者處困能亨則得其正矣非大人其孰能之故曰貞又曰大人者明不正之小人不能當也有言不信又戒以當務晦默不可尚口益取困窮義本○困亨窮必通也處窮而不能自通者小人也貞大人吉无咎者處困而能自通必是履正之大人能濟於困然後得吉而无咎也

王

輔嗣

○困者窮厄委頓之名道窮力竭不能自濟故名
爲困亨者卦德也小人遭困則窮斯濫矣君子遇之則
不改其操君子處困而不失自通之道故曰困亨貞以
處困惟大人能之故得无咎吉乃免也處困求濟在於
正身修德若巧言飾詞人所不信則其道彌窮故戒之
以有言不信也

孔穎達

○貞大人吉謂五也在困无應

宜靜正則吉且无咎

虞仲翔

○京氏傳曰困自否來乾

上九降居二位降而之險坤六二上爲上六柔而掩剛
成困之義以卦氣言之否七月辟卦困九月公卦以剝
爲辟正霜降水涸之時如卦之才德剛雖見掩而不失

中二五適當大人之位所以能亨而守正此文王爲紂所掩之象也故卦辭自言已事大象以致命遂志言則三仁之於商長弘之於周乃其義也

郎顗

○困者柔掩

剛君子困於小人者也九二剛雖見掩而不失中與五

同志是以亨也

陸績

○易曰困德之辨窮困方辨其德

故曰正大人吉无咎言大人君子雖有困厄長守正道以爻論之二者皆有剛中之德故能然也大舜發於畎畝傳說舉於版築及膠鬲孫叔敖之徒皆是也天降大任於是人必先苦其心志勞其筋骨而後亨文王囚美里仲尼厄陳蔡孟子不遇荀卿逃讒是能守其正者有

言不信者在困則誰信

石介

○困卦辭荀九家謂文王

自言已事有言不信謂以善言諫紂而不見信也必散
宜生之徒以寶賂獻之始得脫羑里之囚已而以寶物

爲請始得去炮烙之刑此文王處困之道故得吉且无

咎

解于洗

○困而亨者正也惟大人能紓當世之困解

民倒懸救民塗炭則吉而无咎救時之困利見諸行事

不可垂之空言也其誰信之

房雷

○如卦之才則困而

能亨且得真正乃大人處困之道也故能吉而无咎大

人處困不惟其道自吉樂天安命乃不失其吉也况隨

時善處復有裕乎有言不信當困而言人誰信之

伊川

○兌口不掩言象坎剛中有孚信象坎兌相失故有言不信處困之時當務晦默尚口乃窮故戒

徐幾

測曰困以剛爲主以柔爲敵困者剛也困之者柔也故彖傳曰困剛掩也君子爲小人所掩大業爲否運所掩拚之使不得伸故爲困處險而悅與習坎維心亨同義記曰素貧賤行乎貧賤素夷狄行乎夷狄素患難行乎患難君子无入而不自得焉夫若是則身雖困而道亨所以然者以吾所得於天之正理剛健中正不以窮達而有加損故也即傳所謂剛中是已故曰困亨貞蓋困而能亨則貞矣然非大人不能也

故唯大人乃吉而无咎若文王拘於羑里而演周易
孔子厄於陳蔡畏於匡而談道不絕其困而亨貞吉
且无咎者乎彖又曰有言不信是泛戒夫人之處困
者也况有口象欲以口免困則非處險而悅困亨而
貞矣不信者亨之反也又安得吉且无咎或曰孔子
於宋桓魋固曰天生德於予而又必微服過宋何也
吁義命之說深矣學者安可盡委之命而不盡其義
之所當爲者乎張子有云盡人謀以聽天命茲固守
義安命之道也

彖曰困剛掩也

以卦體釋卦名

本義

○坎剛兌柔剛則掩於柔也

臣

嗣

○剛應升進今被柔掩施之於人其猶君子為小人

所蔽以為困窮矣

孔穎達

○卦所以為困以剛為柔所

掩蔽也陷於下而掩於上所以困也陷亦掩也剛陽君

子而為陰柔小人所掩蔽君子之道困窒之時也

伊川

險以說困而不失其所亨其惟君子乎貞大人吉以剛中

也有言不信尚口乃窮也

以卦德卦體釋卦辭

本義

○處險而不改其說困而不失

其所亨也處困而用剛不失其中履正而能體大者也

能正而不能大猶未能濟困者也故曰貞大人吉處困

而言不見信之時也。非行言之時而欲用言，以免必窮者也。其吉在於貞大人口何爲乎？王輔嗣○剛掩者謂

二五爲陰所掩也。險以說者，此卦本否卦陽降爲險，陰升爲說也。困而不失其所亨也。謂二雖掩陰陷險，猶不失中與位。陰合故通。喻君子雖陷險中，不失中和之行也。貞大人吉，以剛中者，謂五雖掩於陰，近无所據，遠无所應，體剛得中正，居王位則吉而无咎也。尚口乃窮者，陰從二升，升上六成兌爲有言，失中爲不信，動而乘陽，故曰尚口乃窮也。荀九家○困自否來，其否益甚，然不失其亨，且正微大人其孰能之。剛柔自乾坤往來于二

與上而九五未嘗變也是之謂大人

侯果

○初六六三

掩九二上六掩九五

朱震

○以卦才言處困之道也下

險而上說爲處險而能說雖在困窮艱險之中樂天安
義自得其說樂也時雖困也處不失義則其道自亨困
而不失其所亨也能如是者其惟君子乎困而能貞大
人所以吉也蓋以其剛中之道也五與二是也非剛中
則遇困而失其正矣當困而言人所不信欲以口免困
乃所以致窮也以說處困故有尚口之戒

伊川

象曰澤无水困君子以致命遂志

水下漏則澤上枯故曰澤无水致命猶言授命言持以

與人而不之有也能如是則雖困而亨矣

本義

○澤无

水則水在澤下水在澤下困之象也處困而屈其志者

小人也君子固窮志可屈乎

王輔嗣

○水在澤下不能

潤物萬物皆困故曰澤无水困君子之人守道而死雖

遭困厄之世期於致命喪身必當遂其高志不屈撓而

移改也故曰以致命遂志

孔穎達

○命可致而志不可

奪

何妥

○致極盡之義道之不行非已之咎蓋天命也

君子達性命之理不以困躓易其節操恬然自樂以遂

其志

胡翼之

○致至也遂安也能說困以盡心盡心知

性以至於命樂天不樂于人天得之人失之恬然處焉

一人得之天失之介然違焉處與違適於正而安於正此孔子孟荀身困而道亨也

孫坦

○澤无水困乏之象也

君子當困窮之時既盡其防慮之道而不得免則命也當推致其命以遂其志知命之當然也則窮塞禍患不以動其心行吾義而已苟不知命則恐懼於險難隕穫於窮厄所守亡矣安能遂其爲善之志乎

伊川

困何以致命遂志虛齋曰致命如比干之死自獻於先王而萬世不以爲非正命則困而亨貞者也故曰以致命遂志又曰所以遂志只是成就一箇是而已初六臀困于株木入於幽谷三歲不覿象曰入于幽谷幽

不明也

臀物之底也困于株木傷而不能安也初六以陰柔處

困之底居暗之甚故其象占如此

本義

○最處底下沉

滯卑困居无所安故曰臀困于株木也欲之其應二隔其路居則困於株木進不獲拯必隱遯者也故曰入于幽谷也困之爲道不過數歲者也以困而藏困解乃出故曰三歲不覲也

王輔嗣

○杌木謂之株

正義

○以陰

處下臀之象也坎於木爲堅多心株木象也失位困甚故困於株木陰質幽暗水性趨下无所觀見故曰入于幽谷有應在四體性底滯不能自達以至三歲不覲困

之久也

陸希聲

○初居下處困未通必坐以求安譬者

坐之任也株木槎枿之木其形凹坎之象坐槎木而不
安遂退矣求遷於中以近亨坎谷流下退則轉之幽暗
是愈遠所亨故曰入于幽谷三歲數之成也久也求亨
而背馳雖久无所覩矣不言凶者以困而退故不履凶

劉牧

○株木二也初欲進礙二二在困險中所依不可

移易故以株木爲喻初暗劣不知幾執志係應不回心
助明故入于幽谷三歲不覩自初至四歷三爻故以爲
數焉四處說初不能共理其險直待三歲政成乃可見
矣

王昭素

○揜非一人所能故初六之揜九二必將有

待於六三六三則所謂臀也臀得其所據而後其身能有所爲今六三之所據者九二乃疾藜也則臀之困於株木身且廢矣株木蒺藜皆非臀之所據夫以柔助剛則其幽可明以柔掩剛則誰其明之有配在四而不善二是以三歲不得見也

東坡

○六以陰柔處於至卑又

居坎險之下在困不能自濟者也必得在上剛明之人爲援助則可以濟其困矣初與四爲正應九四以陽而居陰爲不正失剛而不中又方困於陰揜是惡能濟人之困猶株木之下不能蔭覆於物株木无枝葉之木也四近君之位在他卦不爲无助以居困而不能庇物故

爲株木。譬所以居也。譬困於株木。謂无所庇而不得安其居。居安則非困也。入于幽谷。陰柔之人。非能安其所遇。既不能免於困。則益迷暗。妄動入於深困。幽谷深暗之所也。方益入於困。无自出之勢。故至於三歲不覲。終困者也不覲。不遇其所亨也。伊川

九二困於酒食。朱紱方來。利用享祀。征凶无咎。象曰困於酒食中有慶也。

困於酒食。厭飫苦惱之意。酒食人之所欲。然醉飽過宜。則是反爲所困矣。朱紱方來。上應之也。九二有剛中之德。以處困時。雖无凶害。而反困於得其所欲之多。故其

象如此而其占利以享祀若征行則非其時故凶而於義爲无咎也

本義

○以陽居陰尚謙者也居困之時處

得其中體夫剛質而用中履謙應不在上心无所私盛

莫先焉夫謙以待物物之所歸剛以處險難之所濟履

中則不失其宜无應則心无私黨以斯處困物莫不至

不勝豐衍故曰困于酒食美之至矣坎北方之卦也朱

紱南方之物也處困以斯能招異方者也故曰朱紱方

來豐衍盈盛故利用享祀盈而又進傾之道也以是而

征凶誰咎乎

王輔嗣

○二以中德被物物之所賴故曰

有慶

正義

○酒食可以悅衆二以剛質爲陰所掩然困

而得中大人求通所以獲吉以大人道濟天下醉飽萬物之心當受命乎天天祿且至享祀則膺大福故曰朱紱方來利用享祀也享謂享帝人臣行之當凶而曰无咎者此文王脫姜里之難而受命之基生焉

陸希聲

○

困於酒食朱紱方來此周公自言攝政時事利用享祀而祖考神明皆應之觀諸金縢之書可知矣然至是則履盛滿而不可復有所往矣故曰征凶及居東而罪人斯得斯无咎之驗也

荀九家

○二有陽明之德无應於

五又在險中如賢人君子不爲上所養也朱紱祭服方來者方方而來皆云此九二君子可以爲王而濟險難

謂此人可衣朱紱而享宗廟也征凶旣在險中何可以
行无咎以其居陽明之德可以无咎正文王姜里中象

石介

○處困中而有剛明之德能自濟者也能自濟則

衆皆歸之衆歸則所奉者厚困于酒食厭飫之象也方
將也朱紱天子之服二有剛明大中之德天子必委任
之降體貌以禮之寵命將至也易中言享祀之類皆謂
以至誠上通于神明故利用享祀人臣之分盡此矣復
求進則凶禍必至凶禍之來已所招也復可咎於人哉
此亦戒之之意

胡旦

○酒食人之所欲而所以施惠也

二以剛中之才而處困之時君子安其所遇雖窮厄險

難无所動其心不恤其爲困也所困者唯困於所欲耳
君子之所欲者澤天下之民濟天下之困也二未得遂
其欲施其惠故爲困於酒食也大人君子懷其道而困
于下必得有道之君求而用之然後能施其所蘊二以
剛中之德困於下上有九五剛中之君道同德合必來
相求故云朱紱方來方且來也朱紱王者之服蔽
膝也以行來爲義故以蔽膝言之利用享祀享祀以至
誠通神明也在困之時利用至誠如享祀然其德旣誠
自能感通於上自昔賢哲困於幽遠而德卒升聞道卒
爲用者唯自守至誠而已征凶无咎方困之時若不至

誠安處以俟命往而求之則犯難得凶乃自取也將誰

咎乎

伊川

六三困于石據于蒺藜入于其宮不見其妻凶象曰據于蒺藜乘剛也入于其宮不見其妻不祥也

陰柔而不中正故有此象而其占則凶石指四蒺藜指二宮謂三而妻則六也其義則繫辭備矣

本義

○石之

爲物堅而不納者也謂四也三以陰居陽志武者也四自納初不受已者二非所據剛非所乘上比困石下據蒺藜无應而入焉得配偶在困處斯凶其宜也

王輔嗣

○乘剛者明二爲蒺藜也不祥也者祥善也吉也不吉

必有凶也

正義

○石之爲物安而不能動者也應在上

六而上六不能應故曰困於石

王介甫

○六三與上六

爲應上又陰爻况當困極合應而不應有若入于其宮

不見其妻凶也

王昭素

○六三陰也而居陽自以爲陽

而求配上六不祥也困之三陰其始相締交而拚剛其

終初六之臀困六三之妻亡小人易合而難久類如此

東坡

○六三以陰柔不中正之質處陰極而用剛居陽

用剛也不善處困之甚者也石堅重難勝之物蒺藜刺
不可據之物三以剛險而上進則二陽在上力不能勝
堅不可犯益自困耳困于石也以不善之德居九二剛

中之上其不安猶藉刺據于蒺藜也進退旣皆益困欲安其所益不能矣官其居所安也妻所安之主也知進退之不可而欲安其居則失其所安矣進退與處皆不可唯死而已其凶可知

伊川

○三求配於上然上官則

是也而非其妻故不得見

王景孟

九四來徐徐困于金車吝有終象曰來徐徐志在下也雖不當位有與也

初六九四之正應九四處位不當不能濟物而初六方困於下又爲九二所隔故其象如此然邪不勝正故其占雖爲可吝而必有終也金車爲九二象未詳疑坎有

輪象也

本義

○金車謂二也二剛以載者也故謂之金

車徐徐者疑懼之辭也志在於初而隔於二履不當位威令不行棄之則不能欲往則畏二故曰來徐徐困于金車也有應而不能濟之故曰吝然以陽居陰復謙之道量力而處不與二爭雖不當位物終與之故曰有終

王輔嗣

○九二以剛德勝故曰金車

何氏

○四處澤底

剛而能載故稱金車徐徐謙貌言困於金車者以澤載水則有功乃物澤既无水稼穡不成是車之空也有德无用故曰困於金車功无所施吝也曰有終者以其下獨應已也且下卦爲水能上潤於澤象下人應已則困

有所濟故能保終也

劉牧

○唯力不足故困亨困之道

必由援助當困之時上下相求理當然也四與初爲正應然四以不中正處困其才不足以濟人之困初比二二有剛中之才足以拯困則宜爲初所從矣金剛也車載物者也二以剛在下载已故謂之金車四欲從初而阻於二故其來遲疑而徐徐是困於金車也已之所應疑其少已而之他將從之則猶豫不敢遽前豈不可羞吝乎有終者事之所歸者正也初四正應終必相從也寒士之妻弱國之臣各安其正而已苟擇勢而從則惡之大者不容於世矣二與四皆以陽居陰而二以剛中

之才所以能濟困也居陰者尚柔也得中者不失剛柔

之宜也

伊川

○坎爲輿九二居坎體而又剛健故曰金

車初六之來徐徐者以困于九二之金車也然四之志則在乎初始若可吝久必有終也

張清子

九五劓刖困于赤紱乃徐有說利用祭祀象曰劓刖志未得也乃徐有說以中直也利用祭祀受福也

劓刖者傷於上下既傷則赤紱无所用而反爲困矣

九五當困之時上爲陰掩下則乘剛故有此象然剛中

而說體故能遲久而有說也占具象中又利用祭祀久

當獲福

本義

○以陽居陽任其壯者也不能以謙致物

物則不附忿物不附而用其壯猛行其威刑異方愈乖
遐邇愈叛刑之欲以得乃益所以失也故曰劓刖困於
赤紱二以謙得之五以剛失之體在中直能不遂迷困
而徐能用其道者也致物之功不在於暴故曰徐也困
而後乃徐徐則有說矣故曰困於赤紱乃徐有說也祭
祀所以受福也履夫尊位困而能改不遂其迷以斯祭
祀必得福焉故曰利用祭祀 王輔嗣 ○兌爲西方之卦
赤紱南方之物此言九五剛猛不能感異方之物也若
但用其中正之德招致於物不在速暴而徐徐則物歸
之而有說矣 孔穎達 ○物莫兩大二之豐則五道減矣

以剛得衆而五怒其進將欲刑之上下敵應不相勝也
故困之矣夫居尊以忿失其道也終以中直久而說矣
至誠感神况赤紱乎故精意祭祀用受其福

十夏傳

○

五以剛中處位能去非類小人救天下之困者也上六
鼻之象六三足之象此皆陰爻掩剛之物於五剛而非
類故刑而去之赤紱諸侯之服五在困世處君位聖主
也困窮而通德辨而明中正道行志則大遂故乃徐有
說也朱紱方來天子之事故利用享祀者天神福之九
五困于赤紱者諸侯之事故利用祭祀者神鬼福之鬼
神交福德之盛者故曰德大備也

陸希聲

○五居尊无

應如君上之困諸侯不臣也赤紱諸侯祭服也以其不臣用刑而刑之已得尊位有陽明之德又中直終必有喜祀天祭地王者之事雖有不服已用中直必須陰得天地之祐天地且福之而況人乎石介○赤亦朱也欲

明二之服故異言之二不已應困无由濟故曰困于赤

紱也

劉牧

○五爲困之主衆所不輔困之極也當用慈

惠仁義屈已下人人則歸之反以剛壯之道刑罰之威以服其人人必不從反爲諸侯之所困也乃徐有說者五本居中履正若能緩而圖之施德布惠人必感服而從利用祭祀者言五感悅之道必須盡其至誠以通於

鬼神也二臣位曰享祀五君位曰祭祀分尊卑之差也

胡且

○截鼻曰劓傷於上也去足爲刖傷於下也上下

皆掩於陰爲其傷害劓刖之象也五君位也人君之困由上下无與也赤紱臣下之服取行來之義故以紱言人君之困以天下不來也天下皆來則非困也五雖在困而有剛中之德下有九二剛中之賢道同德合徐必相應而來共濟天下之困是始困而徐有喜說也利用祭祀祭祀之事必致其誠敬而後受福人君在困時宜念天下之困求天下之賢若祭祀然致其誠敬則能致天下之賢濟天下之困矣二云享祀五云祭祀祭天神

祀地示享人鬼五君位言祭二在下言享各以其所當
用也

伊川

○享祀人臣所以祀宗廟祭祀天子所以禮

正神

耿南仲

上六困于葛藟于臲卼曰動悔有悔征吉象曰困于葛藟
未當也動悔有悔吉行也

以陰柔處困極故有困于葛藟于臲卼曰動悔之象然
物窮則變故其占曰若能有悔則可以征而吉矣

本義

○居困之極而乘於剛下无其應行則愈統者也行則
纏繞居不獲安故曰困于葛藟于臲卼也下句无困因
於上也處困之極行无通路居无所安困之至也凡物

困窮則思變困則謀通處至困之地用謀之時也曰者

思謀之辭也謀之所行有隙則獲言將何以通至困乎

曰動悔今生有悔以征則濟矣故曰動悔有悔征吉也

輔○王註云曰者思謀之辭也爲之謀曰必須發動其

可悔之事今其有悔可知然後處困求通可以行而獲

吉象云未當者處於困極而又乘剛所處不當故致此

困也孔穎達○君子之窮動則生悔天地之道困極必

通不可以動而輒悔遂窮不思變知將有悔思變而行

困窮而通理當獲吉所謂吉凶悔吝生乎動者也知吉

而行故曰吉行行而獲吉故曰變乃通也陸希聲○上

六陰不中正處夫困極不能窮也五以同體居尊任中道以率正糾束之志不得專故困于葛藟也乘剛不安故曰于臲卼也且困之極必反乎井故兌反乎巽則能升井水而上也陰質柔弱雖首能反時以濟困懼乎不逮必有先唱之動悔而至于有悔則獲吉以其時處困極而皆願亨通也衆願從之行之吉也

劉牧

○物極則

反事極則變困既極矣理當變矣葛藟纏束之物臲卼危動之狀六處困之極爲困所纏束而居最高危之地困于葛藟與臲卼也動悔動輒有悔无所不困也有悔咎前之失也曰自謂也若能曰如是動皆得悔當變前

之所爲有悔也。能悔則往而得吉也。困極而征則出於
困矣。故言三以陰在下卦之上而凶上居一卦之上而
无凶何也。曰三居剛而處險困而用剛險故凶上以柔
居說唯爲困極耳。困極則有變困之道也。困與屯之上
皆以无應居卦終屯則泣血漣如困則有悔征吉屯險
極而困說體故也以說順進可以離乎困也。伊川○爻
辭自曰以上困之極也。自曰以下處困之極而思有以
通之也。動固悔矣與其靜而无悔孰若動而有悔爲窮
之通往則吉也。李榕年

測曰卦之爲困剛爲柔所困也以主對敵而言爻論

困義凡剛爻雖困而多功凡柔爻則困而多凶何也
蓋剛者天德也雖處困而未始不亨柔者才質也苟
遇困則鮮有不陷者初六以陰柔之才而處困之底
陰之下又當困不可亨之時以才以地以時而言皆
不足以自濟矣故有臀困于株木入于幽谷三歲不
覿之象困下曰臀坎下正大冬之時木之枝葉盡落
故曰株木幽谷與坎窞同聖人之意若指武庚奄淮
夷而言者蓋謂其終于困而死焉耳矣曰三歲者以
坎之三畫爲數此終于險之象也二五皆有剛中之
德即彖辭所謂大人是已二處險中而詭應之則二

又得卦才之全故其爻辭最善曰困于酒食飲食之
困也曰朱紱方來應接之困也朱紱王者之服也曰
方來見二无求於五而五自來求二也利用享祀神
應之也蓋周公自言攝政時事然至是則亦履盛滿
而不可復有所往矣故曰征凶而於義則无咎也六
三以陰柔不中正之質居四之下而欲推乎四則四
堅而不可動是困于石也居二之上而欲藉二以爲
安二豈能承伏於其下乎是據于蒺藜也昔者三監
欲據武庚以困周公正其象也大傳曰既辱且危死
期將至妻其可得見邪九四位不正當雖正應在初

而爲九二所間故初之來徐徐以困于九二之金車
故也然四之志則欲求初之賢以自助夫初也既以
正應而來徐徐始若可吝終必得合故曰吝有終昔
者周公之居東也位亦稍不正矣大誥友邦君及庶
士御事罔不曰艱大民不靜亦惟在王宮邦君室越
予小子考翼不可征此來徐徐困于金車之象也然
而不敢不極卒寧王圖事救寧王太命此亦有終之
驗也九五本剛正之大人也但爲陰掩之故自疑其
臣故有劓刖之象書曰臣作股肱耳目夫旣自劓刖
則前後左右皆无聞无行之人五也雖曰當宁以臨

其臣不亦徒勞矣乎赤紱者臣朝君之服也故曰困
于赤紱蓋言困于臨其臣焉耳然猶幸中直之心尚
可通于剛中之賢有終合之理故曰乃徐有悅成王
既得鴟鵂之詩又感風雷之變乃悟而迎周公應其
象與占矣然風雷之變亦上天仁愛成王之意其曰
利于祭祀者其積誠以感格于上下之占乎凡此皆
始困終亨之義也上亦以陰柔之才處困極之時故
以困于葛藟于臲卼曰動悔爲象兌正秋有葛藟象
上高危有臲卼象困極則變有動悔象以周公之時
事考之其多士多方之事乎書所謂探天之威離逖

爾土此困于葛藟于臲卼之象然物窮則變故其占
曰有悔征吉書云亦惟爾多士攸服奔走臣我多遜
爾厥有幹有年于茲土又曰我有周惟其大介賁汝
此有悔征吉之驗也

䷮

巽下井
坎上井

序卦困于上者必反下故受之以井承上升而不已必
困爲言謂上升不已而困則必反於下也物之在下者
莫如井井所以次困也爲卦坎上巽下坎水也巽之象
則木也巽之義則入也木器之象木入于水下而上乎
水汲井之象也

程傳

井改邑不改井无喪无得往來井井汔至亦未繙井羸其
瓶凶

井者穴地出水之處以巽木入乎坎水之下而上出其
水故爲井改邑不改井故无喪无得而往者來者皆井
其井也汔幾也繙綆也羸敗也汲井幾至未盡綆而敗
其瓶則凶也其占爲事仍舊无得喪而又當敬勉不可
幾成而敗也

本義

○邑雖遷移而井體无改以不變爲
德者也終日引汲未嘗言損終日泉注未嘗言益德有
常也往者來者皆使潔靜不以人有往來改其洗濯之
性不渝變也已來至井上而未汲井功未成也井道以

已出爲功幾至而覆與未汲同也

王輔嗣

○古者穿地

取水以瓶引汲謂之井此卦明君子修德養民有常不變終始不改養物不窮莫過乎井故以修德之卦取譬名之井焉汔幾也近也緇綆也雖汲水已至井上然綆出猶未離井口而鈎羸其瓶以覆之棄其方成之功雖有出井之勢而與未汲不異喻今人行常德須善始今終若有初无終則必凶咎也

孔穎達

○邑之有井猶國

之有法國可變而法不可易欲汲而來既汲而往不拒不留君子之道亦猶是也

陸績

○邑猶君子之身井猶

君子之德身可貴可賤可富可貧道无加損无喪无得

猶君子積德於身用與不用乃君民幸與不幸耳君子之身何所損益往來井井往來之人蒙其利猶君子之德无不及也

胡翼之

○井之爲物常而不可改也邑可

改而之他井不可遷也故曰改邑不改井汲之而不竭存之而不盈无喪无得也至者皆得其用往來井井也无喪无得其德也常往來井井其用也周常也周也井之道也汔幾也繙綆也井以濟用爲功幾至而未及用與未下繙於井同也君子之道貴乎有成所以五穀不熟不如莠稗掘井九仞而不及泉猶爲棄井有濟物之用而未及物猶无有也羸敗其瓶而失之其用喪矣是

以凶也羸毀敗也

伊川

○井德之地也而以不變爲德

下體本乾上體本坤初五剛柔相易而成井坤爲邑變
坤爲坎改邑也坎水爲井五以剛居中而不變是不改
井也邑居其所而能聚可改而就井井居其所而有常
不可改而就邑汲之而不竭故无所喪不汲之而不盈
故无所得剛往居五柔來居初往者得水而上來者得
水於下往來皆井其井则无饑渴之害矣故曰往來井
井

張清子

測曰先儒有言澤无水爲困命也井有水不改其常
性也知困之義則知安命知井之義則知盡性故曰

困德之辨也井德之地也井之卦辭曰井改邑不改
井蓋言命之所遇雖有富貴貧賤夷狄患難以至於
死生安危存亡萬不一也而性則不改乎舊以其分
定故也是爲改邑不改井是性也即所謂剛中之德
也雖大行不加焉雖窮居不損焉是謂无喪无得是
德也取之左右逢其原溥博淵泉而時出之故曰往
來井井夫天命之性其全體大用若是乎其堅定且
周徧也苟君子不能修己以敬而於安人安百姓之
功或少缺焉是不能盡其性也其與井者汔至亦
未繙井而羸其瓶者同其凶矣故曰掘井九仞而不

及泉猶爲棄井也與甕敝漏而不施於用者同爲棄井凶可知已是故取之左右逢其原井之體也君子藏器於身待時而動博施於民而能濟衆井之用也此盡性之說也夫既能盡其性則自能盡人物之性贊天地之化育矣又何困之不可亨乎此又盡性以立命之功也

蒙曰巽乎水而上水井井養而不窮也

以卦象釋卦名義

本義

○此卦坎爲水在上巽爲木在

下又巽爲入以木入於水而又上水井之象也上音舉上之上井養而不窮者歎美井德愈汲愈生給養於人

无有窮已也

孔穎達

○坎三爻二陰在外爲陰陷井象

也一陽居內陷二陰之中泉之象也以巽遇坎巽木在坎水中巽水而上亦猶鑿木爲機後重前輕挈水若抽者蓋汲井之象也井之汲爲烹飲溉灌日用可旣乎故曰巽乎水而上水井井養而不窮也

李舜臣

改邑不改井乃以剛中也汔至亦未繙井未有功也羸其瓶是以凶也

以卦體釋卦辭无喪无得往來井井兩句意與不改井同故不復出剛中以二五而言未有功而敗其瓶是以凶也

本義

○此釋井體有常由於二五也二五以剛居

中更无他義故不具舉經文也水未及用則井功未成其猶人德未被物亦是功德未就也汲水未出而覆喻修德未成而止所以致凶也

孔穎達

○或謂象主三陽

言五井冽寒泉食是陽剛居得中正邑可改而井不可改也三井渫不食是水未見於用未有功也二甕敝漏是既不得水併其瓶而亡之羸其瓶而凶也

鼃以道

○

坎之中畫其剛中乎君子窮居不損盛行不加窮亦樂通亦樂非剛中不變者能之乎

胡翼之

○巽入於水下

而上其水者井也井之養於物不有窮也取之而不竭德有常也邑可改井不可遷亦其德之常也二五之爻

剛中之德其常乃如是卦之才與義合也汔至亦未繙井言雖使幾至既未爲用亦與未繙井同井以濟用爲功水出乃爲用未出則何功也瓶所以上水而致用也羸敗其瓶則不爲用矣是以凶也

伊川

象曰木上有水井君子以勞民勸相

木上有水津潤上行井之象也勞民者以君養民勸相

者使民相養皆取井養之義

本義

○木上有水井之象

也上水以養養而不窮者也相猶助也可以勞民勸助

莫若養而不窮也

王輔嗣

○荀子曰不足者天下之公

患也苟知勞民勸相之道而以不足爲患者未之有也

王介甫

○水性潤下能上潤於物者井之用也

楊繪

○

木承水而上之乃器汲水而出井之象君子觀井之象
法井之德以勞徠其民而勸勉以相助之道也勞徠其
民法井之用也勸民使相法井之施也

伊川

大象君子以勞民勸相者何曰井取養爲義也勞民
者制田里教牧蓄以君養民也勸相者使民出入相
友守望相助比閭族黨相親相恤教其自相養也而
養之道盡是矣

初六井泥不食舊井无禽象曰井泥不食下也舊井无禽
時舍也

井以陽剛爲泉上出爲功初六以陰居下故爲此象蓋不泉而泥則人所不食而禽鳥亦莫之顧也象云時舍言爲時所棄

本義

○最在井底上又无應沈滯滓穢故

曰井泥不食井泥而不可食則是又井不見渫治者也又井不見渫治禽所不嚮而况人乎一時所共棄舍也井者不變之物居德之地今居窮下則是恒德至賤物无取也

王輔嗣

○井由於源瀆其源則井泥法生於禮

亂其禮則法乖惟井與邑民居所在國墟无人則禽犯井邑苟有人舊井可治一時所舍未可永廢

陸希聲

○禽古擒字猶獲也

崔憬

○初六井泥猶人之德性爲

物欲所拘蔽陷於下愚爲時所棄故曰井泥不食下愚之人親戚叛之故曰舊井无禽

胡翼之

○井與鼎皆物

也就物以爲義六以陰柔居下上无應援无上水之象不能濟物乃井之不可食也井之不可食以泥汚也在井之下有泥之象井之用以其水之濟人也无水則舍置不用矣井水之上人獲其用禽鳥亦就而求焉舊廢之井人既不食水不復上則禽鳥亦不復往矣盖无以濟物也井本濟人之物六以陰居下无上水之象故爲不食井之不食以泥也猶人當濟物之時而才弱无援不能及物爲所舍也

伊川

九二井谷射鮒甕敝漏象曰井谷射鮒无與也

九二剛中有泉之象然上无正應下比初六功不上行

故其象如此

本義

○谿谷出水從上注下水常射焉井

之爲道以下給上者也而无應於上反下與初故曰井

谷射鮒鮒謂初也失井之道水不上出而反下注故曰

甕敝漏也夫處上宜下處下宜上井已下矣而復下注

其道不交則莫之與也

王輔嗣

○井中蝦蟇呼爲鮒魚

子夏傳

○喻中人之性不能應上從師友之訓而反習

於下自敗其材器之象

石介

○下趨者谷之道失井之

道而爲谷故曰井谷井有鮒則人惡之矣然猶至於甕

何也彼有利器肯以我汗之歟必敝甕也

東坡

○二雖

剛陽之才而居下上无應而比於初不上而下之象也
井之道上行者也澗谷之水則旁出而就下二居井而
就下失井之道乃井而如谷也井上出則養人而濟物
今乃下就污泥注於鮒而已鮒或以爲蝦蟆井泥中微
物耳射注也如谷之下流注於鮒也甕敝漏如甕之破
漏也陽剛之才本可以養人濟物而上无應援故不能
上而就下是以无濟用之功如水之在甕未可爲用乃
破敝而漏之不爲用也

伊川

○象云无與者與謂應无

應在上故无提挈之以出者

吳幼清

九三井渫不食爲我心惻可用汲王明並受其福象曰井渫不食行惻也求王明受福也

渫不停汙也井渫不食而使人心惻可用汲矣王明則汲井以及物而施者受者並受其福也九三以陽居陽在下之上而未爲時用故其象占如此行惻者行道之人皆以爲惻也

本義

○渫不停汙之謂也處下卦之上

履得其位而應於上得井之義也當井之義而不見食修已全潔而不見用故爲我心惻也爲猶使也不下注而應上故可用汲也王明則見昭明旣嘉其行又欽其用故曰王明並受其福也

王輔嗣

○此託象殷之

公侯時有賢者獨守湯法而不見任用謂微箕之倫也
惻傷悼也周德來被故曰求王明受福也

子夏傳

○以

陽處陽雖得正而行過乎中猶井雖潔治而不食功未
濟物物思其人故爲我心惻王者以明德在上必汲用
賢人賢人用則得博施濟衆並受其福不獨自利而已

陸希聲

○求王明孔子所謂異乎人之求也君子之於

君也以不求求之其於民也以不取取之其於天也以
不禱禱之其於命也以不知知之井之道无求也以不
求求之而已

王介甫

○九三正而不中故潔而不食不

中非邑居之所會也井未有以不食爲惻者所爲惻者

皆行道之人耳。象云行惻明人之惻我非我之自惻也。是井非敝漏之甕所能容。擇其可用汲者。其惟器之潔者乎。器之潔象王之明者也。器潔王明則受福者非獨在我而已。東坡○三以陽剛居得其正是有濟用之才者也。在井下之上水之清潔可食者也。井以上爲用居下未得其用也。陽之性上又志應上六處剛而過中汲汲於上進乃有才用而切於施爲未得其用則如井之渫治清潔而不見食爲心之惻怛也。三居井之時剛而不中故切於施爲異乎用之則行舍之則藏者也。然王用人豈求備也。故王明則受福矣。三之才足以濟用如井。

之清潔可用汲而食也若上有明王則當用之而得其
效賢才見用則已得行其道君得享其功下得被其澤
上下並受其福也

伊川

○惻者惻此水可用汲而不汲

也汲之者其惟五乎五非應也而曰王明周公特筆也

胡炳

文

六四井甃无咎象曰井甃无咎修井也

以六居四雖得其正然陰柔不泉則但能修治而无及
物之功故其象爲井甃而占則无咎占者能自修治則
雖无及物之功而亦可以无咎矣

本義

○甃亦治也

子

夏傳

○得位而无應自守而不能給上可以修井之壞

補過而已

王輔嗣

○坎性下降嫌於從三能自修正以

甃補五故无咎

荀爽

○井壞則水渾故甃而修之法亂

則民擾故治而正之

陸希聲

○得位无應自守而已如

人但可修德自治

石介

○修潔也陽爲動爲實陰爲靜

爲虛故三陽爲泉三陰爲井井者陰之質也泉者陽之

用也初六最下故曰泥上六最上故曰收六四居於其

間而不失正故曰甃甃之於井所以禦惡而潔井也待

是而潔故无咎

晁以道

○四雖陰柔而處正上承九五

之君才不足以廣施利物亦可自守者也故能修治則

得无咎甃砌累也謂修治也四雖才弱不能廣濟物之

功修治其事不至於廢可也若不能修治廢其養人之
功則失井之道其咎大矣居高位而得剛陽中正之君
但能處正承上不廢其事亦可以免咎也

伊川

○三在

內卦又陽爻爲泉故潔井內以致其潔四在外卦又陰
爻爲井故甃井外以禦其汚蓋不潔則汚者不潔不甃
則潔者易汚此君子内外交相養之道也

丘行可

九五井冽寒泉食象曰寒泉之食中正也

冽潔也陽剛中正功及於物故爲此象占者有其德則

契其象也

本義

○冽潔也居中得位體剛不撓不食不

義中正高潔故井冽寒泉然後乃食也

王輔嗣

○九五

爲卦之主擇人而用之蓋體旣剛直則不食汙穢必須
井潔而寒泉然後乃食以况剛正之主不納非賢必須
行潔才高而後乃用故曰井冽寒泉食也孔穎達○居

於中正爲井之主保井之德養而不窮者也道之上行
人受其施皆得食其井也子夏傳○五以陽明處坎中

是泉之潔而冷者猶當其位明其法信其令天下仰而
生者也輔嗣謂不食不義豈反自食邪自食則博施之
道虧矣孫坦○井冽而皆寒泉可以食矣此周公以象

文王也至上六井收勿幕則是武王與公繼之而其道
大行矣井之食及天下也荀九家○五以陽剛中正居

尊位其才德盡善盡美井冽寒泉食也冽謂甘潔也井泉以寒爲美甘潔之寒泉可爲人食也於井道爲至善也然而不言吉者井以上出爲成功未至於上未及用也故至上而後言元吉

伊川

○三與五皆泉之潔者也

三居甃下未汲之泉也故曰不食五出甃上已汲之泉也故曰食

毛伯玉

○井以陽爲泉者水固天之一陽而生

也巽二陽一在地位趨下射谷而非井矣一在人位居甃之下汲之不及不若坎之一陽浮溢於甃上也井欲溢而井戒盈德與器之辨也

鄭東卿

上六井收勿幕有孚元吉象曰元吉在上大成也

收汲取也。鼂氏云：收，鹿盧收緇者也。亦通慕蔽覆也。有孚，謂其出有源而不窮也。井，以上出爲功，而坎口不掩，故上六雖非陽剛，而其象如此，然占者應之必有孚，乃元吉也。本義○處井上極水已出，井功大成在此爻矣。故曰：井收也。羣下仰之以濟，淵泉由之以通者也。慕，猶覆也。不擅其有不私其利，則物歸之，往无窮矣。故曰：勿慕有孚，元吉。王輔嗣○收，式胃反。凡物可收成者，則謂之收。如五穀之有收也。井功已成，若能不掩其美，不專其利，不自掩覆與衆共之，則爲物所歸，信能致其大功而獲元吉也。孔穎達○水至井上，收井之功也。應

於下引於五博濟而无不施信大成而元吉

子夏傳

○

如人有功德不私其利不伐其能所以爲人信向而大吉

石介

○君子體井之用德則取其有常行則取其清

潔義則取其博施善則取其有終也卦辭雖不具四德而四德具矣

劉牧

○井以上出爲用居井之上井道之

成也收汲取也幕蔽覆也取而不蔽其利无窮井之施

廣矣大矣有孚有常而不變也博施而有常大善之吉

也夫體井之用博施而有常非大人孰能他卦之終爲

極爲變唯鼎與井終乃爲成功是以吉也

伊川

○井六

爻綱領最好初井泥二井谷皆廢井也三井渫則渫初

之泥。四井甃則甃二之谷。既漂既甃則井道至矣。故五爻井冽而泉寒。上爻井收而勿幕。功用始及物而井道大成矣。李季辨

測曰井以養爲義。養必有本。初六不泉而泥。猶人之德往爲氣稟物欲所拘蔽。不能修治以施於用爲時所棄。雖親戚亦莫之顧矣。是爲井泥不食。舊井无禽之象。九二剛中本有泉也。然下比初六。故曰井谷射鮒。以賢聖而隱於畎畝版築之間。所與處者皆庸衆之人。有井谷射鮒象二本可以養人濟物也。而上无正應。故曰甃收漏在位者皆妨賢媚嫉之人。无有與

之同升諸公者此甕敝漏之象也九三以陽剛居得其正井渫可食矣而不食何哉蓋以正應在六才柔而不能汲之之故也三在下之上人皆知之爲我心惻言行道之人皆爲我心惻也可用汲以下三句皆惻之之辭其謂猷畝版築之賢聖苟有能用之者其皆可以爲聖君賢相也乎此爻通以象言而占在其

中胡炳文曰汲之者其惟五乎五非應也而曰王明周公特筆也六四井甃修井也在人則是能修潔不汗於流俗者然厚有餘而才不足若魯之孟公綽唐之盧懷慎是其人也故曰无咎或曰无泉甃之何益

曰四之甃所以甃二之谷也而五之寒泉食由之以
生安有逆計其无泉而不甃者哉九五陽剛中正其
才其德盡善盡美且居尊位是大德受命之人也故
其象爲井冽而其寒泉爲所食也此爻之辭周公蓋
以象文王事上六井收勿幕則是武王周公繼之其
道大行之時矣有孚元吉言君子有實德而其施不
窮猶井之有泉而其出不窮也程傳曰非大人其孰
能哉元吉可知已二泉邵氏曰井至於渫君子修己
之極也井道之小成也井至於收君子及物之極也
井道之大成也

周易義叢卷之九終